

東  
華  
續  
錄

東華續錄

同治十六

臣王先謙敬編

臣張式恭恭校

十一月己酉朔日食○諭議政王軍機大臣等毛鴻賓奏請畱江忠義軍勦辦粵西賊匪並擬將總兵沈宏富接辦田興恕軍務各摺片粵西爲髮逆起事之地黃三張高友等股均係著名悍匪且恐與洪逆仍聲息相通張高友股久踞蓮塘據稱自江忠義一軍越境會勦克復修仁之後賊俱退回老巢而分扼桂嶺老縣各要隘負隅抗拒江忠義所部鄧子垣等與粵軍合力進勦劉長佑簡任兩廣總督一俟藩司劉坤一到潯接統潯州軍事卽日東下江忠義一軍應責成專辦蓮塘之賊以清楚粵巨患未便遽行抽動致賊得以乘虛奔突湖南此時勢難另籌援粵之師以相更替江

忠義之軍著卽畱於粵西專辦蓮塘等處賊匪劉長佑張凱嵩卽嚴飭粵省兵團會合力圖埽蕩總兵沈宏富據毛鴻賓奏厯在田興恕軍營總理營務於田興恕舉動未協之處尙能有所匡正打仗亦極勇敢若令接辦田興恕軍務尤屬相宜卽照所請貴州提督著沈宏富署理潘鐸就近察看該員如果勝任卽將提督印務移交責令會同韓超將黔省軍情妥爲籌辦石逆股匪見由遵義分股竄走黔西湄潭等處卽著選派得力之軍會同楚省分扼沅晃各邊界之趙福元等軍相機兜剿併力殲除並著潘鐸韓超催令田興恕懷遵前旨迅卽赴川由駱秉章差遣調度毋再遷延致干重咎劉坤一是否抵潯劉長佑何日交替馳赴廣東新任殊深廑系廣東省城內外伏莽蠢蠢欲動雖據勞崇光將爲首者拏辦不過目前暫安而根株未絕須俟劉長佑到任後接續相機妥辦

不可稍涉大意江忠義一軍既經畱粵不但蓮塘進剿各軍可資督率卽潯州各營亦可相爲聯絡以資得力湖南永桂一帶土匪既與張高友遙相勾結並著毛鴻賓飭令派防之前江蘇臬司陳士杰與江忠義所部互通聲息設法兜撿以免蔓延將此由六百里各諭令知之○庚戌賞王大臣暨內廷翰林院各省將軍都統督撫宣宗成皇帝聖訓各一部○諭內閣陝西按察使王承基署鹽法道韓泰華均著勒令休致該二員見有被參各款仍著畱於陝西聽候查辦○諭議政王軍機大臣等近聞毛震壽勦辦洋縣等處賊匪甚不得力川勇與賊接仗往往開放空槍且姦淫擄掠無所不爲毛震壽不但約束不嚴有以此等情事告知者該藩司一意袒護不肯查辦毛震壽圍洋縣數月之久毫無成效可見所部勇丁暗與賊通之說不爲無因漢中距川不遠駱秉章見聞

可及卽著確切查明如毛震壽所帶川勇實有通賊情事卽將該勇撤回另派得力兵勇前往接替儻毛震壽因循玩誤卽著據實嚴參治罪其陝藩一缺如有勝任之人並著該督一併保奏聽候簡用毛震壽如係應撤則洋縣等處全軍是否可交易佩紳統領抑可卽交新保之藩司統帶均著酌度具奏該督向不瞻徇想不敢以保奏在前稍存回護也將此由五百里諭令知之○以丁寶楨署陝西按察使由湖南長沙府知府署○辛亥僧格林沁國瑞奏臣等進攻將集該圩擒首陳萬福勾結劉狗楊懇汰黨與死守兼有張落刑等爲之接應併力抗拒十月十五日據報張落刑等遣悍黨在渦河南岸之朱莊韓莊一帶盤踞欲攻投誠各圩十六日派翼長蘇克金等帶本隊及投誠馬勇前往迎剿並飭舒通額帶隊接應敗賊於丁固寺殲斃多名該逆分股狂奔遁入破寨者經蘇克金

等悉數剿除其由南岸竄者經舒通額督隊截擊斬馘多名逃脫無幾十八日捻首楊魁汰率眾來援蔣集營總恆齡帶隊迎剿斃賊數十名生擒十餘名餘匪束竄遁入賊圩臣等復督軍進攻蔣集連日各股捻黨來援均經馬隊迎剿擒斬多名又探得張落刑勾結孫醜兒等各股竄至渦河以北距大營東南十五里之趙村屯聚意欲來撲見在相機迎剿惟軍餉缺乏直隸山西山東河南四省協餉撥解寥寥兵勇嗷嗷待哺萬難久持且見經深入痛剿賊勢窮蹙悔罪者業已投誠而死黨益負嵎堅守亟宜添募勇丁迅圖攻拔而募勇又不如用降眾爲前敵較易得力重賞之下必有勇夫雖需餉較繁而事半功倍當此軍情緊要若因餉匱致形棘手所關甚鉅惟有仰懇 鴻慈嚴飭直隸山東河南各督撫將每月協餉銀三萬兩山西巡撫將每月協餉銀二萬兩按月解

足庶士卒無枵腹之虞數月之間可期蒞事 上諭議政王軍機大臣等僧格林沁奏該大臣見已進抵毫南深入捻境若因餉需不繼有誤軍行機會誠屬可惜著於直隸等省餉到後卽行招集降眾率爲前驅用資攻剿前據勝保在皖省督軍時奏請派員辦理周口釐金此項釐金每月可得若干著該大臣查明是否足資貼補卽行奏聞以便降旨歸該大臣提取充餉庶道途較近或可稍濟眉急不至停兵待餉以利軍行德楞額在雲谷山失利據所稟各情與譚廷襄原奏不符恐係該副都統豫爲卸罪地步譚廷襄雖庸懦無能但其所參各情未必盡屬子虛定安人尙明白惟遇事未能剛斷有爲著該大臣畱心察看隨時訓飭俾知振作所有密陳一摺著畱中備覽將此由六百里諭令知之○命直隸山東河南月撥銀三萬兩山西月撥銀二萬兩濟僧格林沁軍餉○

壬子諭內閣前因僧格林沁奏參鄭元善辦事遲鈍御史呂序程奏鄭元善奏報欺飾並據光祿寺少卿董元章御史劉毓楠奏稱河南州縣殺團冒功大吏縱兵殃民各摺片當經簡派侍郎張之萬前往查辦本日據張之萬奏派令隨帶司員至孟津渡口訪查該處原派文武委員諸多疏懈由洛至偃殘破彫敝情形可憫會元局殺團一案與原參大畧相同汝州之案亦然各等語河南巡撫鄭元善由河南州縣不數年間擢任封圻值此時勢艱難宜如何激發天良力圖報稱乃到任已將一載於奏報軍務及交查事件一味粉飾致吏治軍務日就廢弛復任令劣員擅殺殃民以致各屬團練紛紛解體實屬有負委任鄭元善不勝巡撫之任著以道員降補交吏部帶領引見以示薄懲其未經查明各案仍著張之萬秉公查明具奏○諭議政王軍機大臣等張之萬奏派員訪



查各處情形據實具奏各摺片張之萬既經簡署巡撫應卽將會  
元局一案徹底根究孟津渡口原派各員查明參奏其未經訪查  
各節仍著次第查明辦理至毛昶熙所帶兵勇五千人中惟楚勇  
一千五百名尙稱得力此外可用者未必及半自當嚴加甄汰以  
期一兵得一兵之用著毛昶熙將見在存營兵勇親加裁汰酌留  
精壯三千名赴汝甯一帶督同張曜一軍勦辦陳大澹匪巢以節  
虛糜而收實效河南吏治民風彫敝已極張之萬責無旁貸務須  
力圖整頓擢用廉能之吏甄別貪劣之員帶兵將士尤宜善爲駕  
馭使之知興知感俾盡其力屏除虛僞宗尙樸誠實所厚望變通  
折漕一節本日已交戶部速議具奏如果無病於民有利於國該  
署撫卽須推行盡利仿照湖北章程斟酌辦理汝州軍情緊要該  
處地又適中鄭元善已令來京如必須該署撫親往駐紮著迅卽

出省前赴汝州駐紮接統鄭元善之軍調度一切其省城事宜卽著交王憲妥爲布置本日勝保奏河南藩司王憲貽誤軍餉三月之久復巧詞搪塞等語豫省應解勝保軍營協餉其欠若干該藩司是否有心遷延著張之萬查明具奏並催令將欠解月餉趕緊籌解毋誤要需將此由六百里各諭令知之○諭勝保奏馳赴同州進剿王閣村等賊巢獲勝並奏參貽誤軍餉之藩司各摺片該大臣自稱抵同未及三日獲此全捷差可壯我軍威而王閣村等處賊巢憑寨抗拒兵勇旣不能進攻賊轉得以跟蹤來撲是逆餒並未少戢其蔑視官軍兇狠情形堪爲髮指見經穆騰阿等馬隊將賊擊敗著勝保督率各軍乘此迅速進兵實力攻剿毋再遲延紛飾致干重咎至所稱軍營餉需匱乏情形本日業經寄諭瑛棨責成籌款運解及時接濟署藩司劉齊銜玩誤各情如何將奏定

有著之款撥抵陝西歸於無著之處亦經諭令新授署河南巡撫張之萬查奏辦理如果該二員確係有心玩誤諒該管巡撫等亦不敢不據實奏參以憑懲辦各路軍營餉需均屬匱乏勝保亦不得以餉源未裕爲詞弗自振作致蹈遷延貽誤之罪希圖卸責也將此由六百里諭令知之○諭徐宗幹奏臺屬軍情復緊亟籌添兵濟餉前往援應一摺據稱官軍正在圍偏彰化縣城另股匪黨竄陷斗六嘉義可危郡城亦將震動等語前據該撫奏稱林向榮攻毀潮洋厝等處匪巢前赴斗六一帶協剿全臺大局尙爲安定各屬官民同心防禦不至滋蔓爲害是該撫剿辦臺屬賊匪業已確有把握何以此次又稱另股匪黨由間道南竄斗六失陷可見匪勢仍不少衰我軍守禦並未得力該撫疊次所奏軍情諒僅聽臺屬官員稟報之詞此次斗六失陷臺郡情形岌岌亟應妥籌布

舊著耆齡徐宗幹迅卽振刷精神嚴飭派出各軍將彰化斗六等處匪徒迅速殄除不得徒事粉飾日久無功致干重咎至臺灣北路竄匪雖已搜剿淨盡仍著飭令道員區天民激勵勇丁嚴密防堵以杜蔓延林向榮及斗六軍營文武各官下落並著查明據實具奏將此由六百里諭令知之○以張之萬署河南巡撫

由吏部  
左侍郎

著○癸丑諭議政王軍機大臣等昨據僧格林沁奏遵旨密覆勝保各款蹟一摺摺內有陳四眼狗之弟二人被獲後餽送勝保金銀數千兩是以勝保並未將其正法仍畱在營當差賞帶頂翎各等語四眼狗之弟二人係屬何名所賞係何項頂翎見在營內充當何差多隆阿計將行抵潼關著僧格林沁多隆阿各遣人設法訪查確實迅速先行密奏將此由六百里各密諭知之尋奏四眼狗有義弟陳聚成陳安成勝保曾令薙髮管帶降眾旋即逃逸不

知何往並無賞給翎頂之事報聞○甲寅諭內閣大學士銜管理工部事務翁心存見在患病甚重伊子翁同書著刑部暫行釋放俾侍奉伊父湯藥以示體恤○李鴻章吳棠奏查從前南軍駐金陵北軍駐揚州相距較遠不得不分設江南江北糧臺因地籌餉以供支應自金陵大營潰散馮子材一軍退守鎮城與揚州一江之隔兩岸水陸各營聲息相聞本無庸分作兩臺徒增局員浮費且啟畛域紛爭之漸見在鎮江陸營軍餉須由江北籌濟水師軍餉以沿江釐金爲大宗亦由江北督查若以北臺兼辦南臺就近經管事理極順且北岸肅清後揚州防兵亦應分軍渡江會剿糧臺事權歸一呼應較靈查候補道許道身精明幹練以之總辦兩臺可期勝任應卽將江南糧臺歸併江北統由許道身經理其南北支放及水陸分解事宜悉照向章不准牽混仍責令將沿江口

岸釐捐會同水師鎮將逐加整頓覈實支放以期涓滴歸公李鴻章奏查幫辦江北軍務浙江黃巖鎮總兵黃彬總統水師專以設卡圖利爲事縱容所部擄劫商民藉圖肥己沿江賊踞各城及附近口岸未聞其痛剿一次攻克一處偶奉檄飭則焚毀江邊村莊擄殺難民捏報勝仗平日跋扈橫行結黨怙勢民怨沸騰都興阿素性謹厚既恃水師爲陸營護衛或不便窮治其奸臣屢奉諭旨飭查長江師船不敢代爲隱飾惟求一廉能之將接代統領實難其選准署漕臣吳棠函稱水師各員惟溫州鎮總兵吳全美尙肯任事此時既議歸併糧臺必須將各幫師船及沿江釐金嚴飭會同從新整頓方能有濟等語臣愚以爲廣勇獷悍非粵人不能駕馭新調紅單船三十六隻又已到齊須將損壞舊船認真裁減以節糜費非另派鎮將大員實力整理不可可否仰懇 特旨將黃

杉撤去幫辦軍務總統水師各差立予革職解交曾國藩查辦暫令吳全美接統師船歸曾國藩都興阿節制飭將所部舊船設法裁撤新到艇船責令練習營規禁絕騷擾其沿江釐卡令許道身派員稽收均勻攤放不准泊防師船分段把持任意提用庶積弊可漸轉移 上諭浙江黃巖鎮總兵黃彬自幫辦江北軍務以來總統水師從未見其於沿江賊匪所踞各城及附近口岸痛剿一次攻克一城迨經訪察該總兵專以設卡罔利爲事縱容兵勇擱劫商民藉圖肥己偶奉檄飭焚毀沿江村莊擄殺難民捏報勝仗跋扈橫行肆無忌憚黃彬以微末武弁不數年間擢至專閫派令幫辦重任宜如何整頓營伍奮勇剿賊乃竟敢恃恩驕恣肆意妄行以致民怨沸騰若不從嚴懲辦何以肅軍律而飭戎行黃彬著撤去幫辦軍務總統水師各差卽行革職並著都興阿解交曾國

藩軍營聽候查辦○李鴻章奏臣前以金陵軍務緊急酌調常勝軍赴援並飭吳煦楊坊催令白齊文迅速配船購礮旋據曾國荃函稱金陵援賊屢經懲創亟欲回顧蘇崑已於十月初四五等日解圍而遁見在沿江賊營均已攻毀惟九洲洲與七里洲下關賊壘相望爲長江之梗若令常勝軍攻破九洲洲賊壘則長江盡爲我有往來無阻臣當飭令吳煦等遵照馳赴九洲洲合力進攻據報於十月十九日由滬啟程曾國荃乘戰勝之威得此軍協助可期得手至忠逆回蘇州之後將謀嘉定其大股尙潛伏未動臣嚴飭四江口黃渡各營加緊巡防並商請署提臣黃翼升督帶師船分扼青浦泖澱各湖上通蘇崑之路新募淮軍冬內陸續可到俟訓練稍熟從下游相機夾剿以蹙賊勢上諭議政王軍機大臣等金陵大營旣已解圍曾國荃卽飭常勝軍進攻九洲洲所籌極



爲扼要見在輪船十七隻聲勢甚壯九洑洲何時可以攻克七里洲下關等處賊壘相望九洑洲攻克之後即可飭令白齊文等乘勝掃蕩此項輪船租借之費甚繁著李鴻章嚴飭吳煦楊坊等迅速攻克不准稍涉遷延見在總理衙門所購辦之輪船不久可以入江屆時作何布置之處著曾國藩等酌度奏聞其常勝軍赴援金陵兵費需用若干著李鴻章查明具奏前據袁甲三奏稱李世忠派兵進攻九洑洲該提督所派兵勇是否得力並著曾國藩等查明具奏九洑洲七里洲並南岸自燕子磯以達下關等處形勢卽著該大臣等詳細查明繪圖貼說隨報呈覽江甯府城將來進兵之路及雨花臺紮營處所諒曾國藩早已繪圖並著照給一分一併呈覽忠逆有潛謀嘉定之意見在雖伏而未動不可不加意嚴防著李鴻章會商黃翼升水陸防範該撫所募淮勇見在是否

抵滬著李鴻章於此軍到後相機攻剿以蹙賊勢南北糧臺歸併辦理既省局員浮費呼應亦復較靈卽著照李鴻章吳棠所議責成許道身經理認真支放剔釐弊端仍不准南北牽混以清眉目總兵黃彬已明降諭旨革職解交曾國藩查辦所有江面師船著總兵吳全美接統仍歸曾國藩都興阿節制著該大臣等嚴飭吳全美將所部舊船設法裁撤新到艇船責令訓練營規禁絕騷擾其沿江釐卡卽由許道身派員稽收不准泊防師船分段把持朝廷於諸將功罪均能洞燭卽如馮子材自本年以來整頓營規節省餉需頗有成效若吳全美能如此用心自可長承恩眷並著曾國藩等諭知該總兵認真整頓毋蹈舊習馮子材魁玉於糧臺支放章程及沿江水師情形並著畱心稽覈都興阿富明阿於水師積弊務當破除情面隨時整頓儻因循貽誤別經發覺不能稍邀

寬典至俄國兵船三隻業已抵滬卽著畱於上海隨時駕馭防剿  
薛煥李鴻章相機接待用敦和好再徐宿爲捻逆出沒之區自毫  
南以達懷遠等處捻巢林立而鄴費邳宿屢經捻逆滋擾沐陽贛  
榆海州各州縣亦時加防範著吳棠詳細查明民莊捻圩山川道  
里繪圖具奏其在皖北各地方卽咨唐訓方會同繪圖務以詳細  
爲要不可稍涉疏畧將此由六百里各諭令知之○准徐樹銘回  
籍養親以黃倬爲兵部左侍郎由內閣學士遷○乙卯諭議政王軍機大  
臣等唐訓方奏行抵臨淮接防日期一摺另片奏請飭已革總兵  
普承堯赴營差委等語臨淮戰守籌餉事宜唐訓方業已與袁甲  
三逐一講求自必益臻妥協唐訓方擬將所部逐加訓練並親赴  
各要隘妥爲布置卽著認真整頓務令戰守確有把握方爲不負  
委任普承堯旣據唐訓方奏稱該革員久歷戎行打仗勇敢著准

其調赴軍營惟該員前在建德失機獲咎甚重仍應責令帶罪圖功以觀後效儻再不知奮勉卽隨時從嚴參辦毋稍瞻徇將此由五百里諭令知之○諭滿慶等奏請賞達賴喇嘛師傅一摺據稱准達賴喇嘛咨據布賚綳寺喇嘛等公同稟稱從上年起傳習達賴喇嘛經典之正副師傅均係成豐年間奏奉 諭旨欽定近雖接續傳習而時徵掌辦事務竟未稟請具奏本年春閒紋結色呼圖克圖病退後亦不揀人接充見奉飭選副師傅惟有沙布嚨普爾覺呼畢勒罕羅布藏楚稱甲木巴勒嘉木磋人極老成經典純粹充當達賴喇嘛副師傅實堪深任其羅布藏青饒汪曲講演佛法始終如一請照第七輩達賴喇嘛之正師傅阿旺卻墊蒙賞阿齊圖諾們罕名號並九輩十輩達賴喇嘛及此輩班禪額爾德尼師傅等均蒙賞諾們罕名號之例施恩賞給正師傅羅布藏青饒

汪曲名號准其轉世並准普爾覺呼畢勒罕羅布藏楚稱甲木巴勒嘉木磋接充副師傅以資訓迪各等情由該大臣據請轉奏等語著福濟景紋於抵藏後按照該喇嘛所咨情節詳細查看滿慶等代爲奏請是否出於秉公應如何辦理之處酌度具奏原摺著鈔給閱看將此諭令知之○諭薛煥等奏遵籌荷蘭國通商事宜並鈔給該領事札文呈覽一摺此次荷蘭國懇請換約經薛煥示以和好曉以利害所給札文誠信周到甚爲得體第該國旣以換約爲請恐日後仍遣使前來見在給與札文之後該領事方姓有無他語仍著薛煥李鴻章畱心察看隨時具奏儻該國遣使前來卽著薛煥等妥爲辦理將此由五百里各密諭知之○允戶部奏籌撥來年京餉並各省地丁等項一律停收鈔票○申諭譚廷襄勦辦淄川踞匪○調麒慶爲倉場侍郎恆祺爲工部左侍郎以阿

克敦布爲刑部右侍郎

由左副都御史遷

○丙辰諭內閣大學士銜管理

工部事務翁心存品學純粹守正不阿自翰林洊擢正卿入直上

書房疊受

先朝知遇之隆簡任綸扉總理部務嗣於咸豐九年

閒因病開缺朕御極之初蒙我兩宮

皇太后簡用耆臣重加倚

畀以大學士銜管理部務並命在弘德殿授讀朝夕納誨啟沃深

資方冀克享遐齡長承恩眷茲聞溘逝悼惜良深著賞給陀羅經

被派醇郡王帶領侍衛十員卽日前往奠醑加恩晉贈太保照大

學士例賜卹入祀賢良祠任內一切處分悉予開復應得卹典該

衙門察例具奏伊子翁同書昨經有旨令刑部暫行釋放並著俟

穿孝百日後再行監禁伊孫舉人翁曾源著賞給進士准其一體

殿試候選同知翁曾純著以同知卽選監生翁曾榮著賞給舉人

准其一體會試刑部學習郎中翁曾桂著作爲候補郎中舉人翁

曾翰著賞給內閣中書用示篤念盡臣至意尋予祭葬諡文端○  
曾國藩奏僞忠王李秀城由蘇州糾約各路賊黨以僞輔王楊輔  
青等股擾甯國僞護王陳坤書等股由太平府窺金柱關而親率  
十三僞王號稱六十萬眾赴援金陵自方山至板橋鎮旗幟林立  
閏八月二十日句合城賊直逼我營曾貞幹等縱軍兜擊斬級甚  
多二十一日城賊援賊復同時並進曾國荃令各營堅壁固守俟  
其撲近排礮轟擊賊眾旋伏旋起晝夜環伺二十二日賊攻東西  
兩路各營並趨洲上鈔出猛字諸營之後我軍分路馳剿賊眾卻  
走曾國荃以洲上關緊糧道乘夜修十數壘撥兵駐守二十三日  
賊攻猛字諸營及東路湖橋各營卡均經擊退二十五日復擊敗  
圍逼西路諸營之賊破其四壘擒斬三百餘名二十六至二十八  
等日賊眾乘夜悉向東路逼營而陣槍礮雨集並潛通地道百計

環攻官軍負牆露立拋擲火毬殲賊無算二十九日賊負板蛇行而進炸礮橫飛烽燧蔽天賊眾束草填濠欲上官軍以長矛擊刺前者曳屍後者更進曾國荃督軍策應礮子傷頰仍裹創力禦九月初一日復有大股悍賊自浙東來援攻吉後營礮臺曾國荃引軍馳救力破賊眾初二至初四等日賊以箱篋實土列濠邊以禦礮其下暗鑿地道我軍用火箭攢射並出銳卒誘賊近濠突擊賊鋒稍挫復於初五日分三路出擊焚毀西南賊壘十二座斃賊約三千名自是賊不敢復犯後濠東路之賊自初六日後環偏如初我軍且堵且戰斃賊七百餘名援兵繼至軍威頗振十二日西南賊匪悉併東路曾國荃知地道將轟急令各營謹備而嘉字吉後兩營外霹靂驟起土石齊飛各壘營牆十數丈賊眾萬餘乘隙直上礮弩齊發擁入壘口者已千餘人我軍扼守內濠寂然不動俟



烟開土落分路攻出鋒刃交錯將牆內賊匪斬戮無遺牆外之賊更番猛撲經我軍出擊斃賊不少副後營地道同時迸裂信字等七營亦同時被圍均經我兵將賊擊退是役殺賊約近萬人斬僞德王及僞主將等多名十三日後賊復從東路別開地道被我軍連破四處擒斬五百餘名二十四五等日又破地道二處煙薰水灌賊無一生復乘夜襲破賊壘三處擒斬數百名二十八日劉連捷營中發土丈許地道之賊皆不能遁悉行瘞斃三十日官軍乘夜攻破賊壘二座擒斬二百五十餘名副後營及曾國荃中軍亦於十月初一二等日迎鑿地道堵塞洞口賊計益窮初四夜間曾貞幹等偵知西路賊匪將圖宵遁乃整隊分道並出曾國荃亦令李臣典等徑攻東路平明焚東路前敵四壘賊眾逸出悉就誅夷西南之賊亦望風爭竄我軍分路追剿埽平賊壘數十座生擒約

四百名斃殿後悍賊約七千名接勦至方山之西雨花臺守賊勾結城賊大股齊出欲截我歸路官軍左右夾擊賊眾分路而遁見仍畱悍黨在秣陵關六郎橋等處築壘布置曾國荃以士卒傷病過多飭各營嚴密防守俟新募之卒到營再圖進勦忠逆李秀城回蘇後分股力攻九洑洲官軍營盤圖犯江北提督李世忠親赴九洑洲竭力堵勦幸獲保全查此次蘇浙諸賊酋大舉入寇各營將士以寡禦眾苦守力戰四十六日卒解重圍保全大局在事文武著有微勞除臣弟曾國荃曾貞幹不敢仰邀議敘外所有尤爲出力各員謹開列懇恩獎敘以昭激勸陣亡員弁一併開列請旨飭部分別議卹以慰忠魂 上諭曾國藩奏金陵各營屢獲大捷力解重圍一摺此次金陵官軍苦守力戰四十六日以少擊眾將大股賊匪擊敗痛如掃除斬戮無算洵足以寒賊膽而快人心各

營將士實屬異常奮勇自應量予恩施以昭激勸江蘇布政使曾國荃著賞給江紬黃馬褂料一件小卷江紬袍料一件白玉喜字翎管一枝白玉柄小刀一把曾貞幹著加恩以知府用卽補道劉連捷所請以按察使記名簡放前廣東南韶道吳坤修所請仍以道員記名簡放均與吏部新定章程不符惟此次金陵督兵苦戰並有殲斃賊中頭目戰功卓著與尋常勞績不同劉連捷著准其以按察使記名簡放並賞加布政使銜吳坤修著准其仍以道員記名簡放○諭鄭元善奏汝甯各軍連克徐寨等處一摺河南逆匪陳雙濤等屯踞徐寨等處經總兵張曜等督率兵勇密約內應於十月十二日乘夜進攻越濠搶進立將徐寨攻破擒首陳雙濤等均經拏獲無一得脫復調各營移紮范寨及馮寨之間相機攻戰十七日夜官軍直擣范寨參將保善等各持兵刃首先躍登各

營繼進立破范寨擒首蔣之成等悉數擒獲訊明正法我軍復進薄馮寨四面圍攻該寨民旋將擒首馮激選細縛張曜等督兵進寨餘匪搜殺淨盡立將馮激選斬梟示眾剿辦尙爲得手著卽督飭各軍乘勝進攻將正信羅息各境匪蹤次第掃蕩毋畱餘孽○  
閩閩藩奏甯國悍賊黃汶金胡鼎汶於十月初五日率大股渡過灣沚占踞西河鮑超派宋國永攻勦未能得手水路糧運梗塞臣派員於繁昌南陵趕辦陸運又派何紹彩等營由南陵往援以護陸路並自金陵調出王可陞五營由蕪湖往援冀通水陸總期保運道以保鮑營然後甯郡可守賴古等股於十月十二等日圍攻旌德縣城總兵朱品隆出戰敗挫請援甚迫臣調王文瑞一軍自休甯前進周萬倬一軍自涇縣前進救援旌德自夏秋以來疾疫大作諸軍羸病之餘尙難遽振由金陵至徽州祁門八百餘里地

段過長賊股過眾加以皖北十餘城毫無準備臣反復籌思實恐潰散決裂盡隳前功合無籲懇 天恩簡派大臣會辦諸務俾臣

責任稍分案牘稍簡更得專精竭慮圖報涓埃至福建按察使張運蘭當甯國疾疫流傳之際不避艱險抱恙入城駐守見在病勢不支具稟自陳臣因伊弟張運桂甫卒於軍幫辦文案各員亦多物故已批令該臬司迅卽離營回籍養病其所部湘勇十營派總兵易開俊劉松山各統五營分守甯國府涇縣兩城惟此外八營皆其比肩共事之員官職相等可否籲懇 天恩將易開俊劉松山簡放實缺總兵俾資統率亦使張運蘭得以安心調養又奏據安肅道蔣凝學稟稱駐防潁州之湘營於十月初六日出外樵採被苗沛霖之黨王全全部下殺斃勇夫九人初十日駐防壽州之湘營出外樵採復被苗黨李萬春部下擄去七人殺害三人並鈔

呈苗黨上僧格林沁稟稟請僧格林沁撥兵三百名與壽春鎮總兵李璋同守壽州將楚師撤出等情臣以苗沛霖意在挑釁稱兵一面批示蔣凝學忍之又忍一面函商僧格林沁請其將如何批發苗稟密告臣處以免辦理兩歧旋又據蔣凝學稟鈔呈僧格林沁與苗沛霖札彙撥給銀一萬兩令其帶練勦擒等情臣查僧格林沁於苗沛霖加意牢籠冀其就我範圍助勦擒匪而苗沛霖前後稟詞痛詆楚師又擄殺湘營十九人殊出情理之外湘勇駐防壽州正陽關與苗練偏處太近若再殺擄挑釁將欲始終含忍則彼以前此施於孫家泰等故技構怨無已將欲聲罪致討又恐有礙僧格林沁撫苗勦擒之局再四思維殊無善策刻下江北自和含廬巢上至舒桐潛太處處空虚九洑洲粵匪銳意北竄正苦無兵調防臣擬將壽州正陽關之湘勇撤出並將霍邱防兵抽出調

至廬巢一帶其壽州一城卽由僧格林沁派兵駐防如苗黨之所請或該練從此真心向化竭力勦捻助僧格林沁一臂之力亦未可知臣自問與僧格林沁毫無阻闕而外間頗疑主撫主勦議論不合苗沛霖遂大肆簸弄必欲使南北兩軍不和而後快臣故思抽出壽州正陽之兵以遂苗黨之私以成僧格林沁急欲滅捻之計是否有當伏祈訓示都興阿奏忠侍兩逆圍攻金陵大營數旬未能逞志且因江北撥兵上援意欲乘虛分竄北岸牽掣我軍當飭各營加意防禦咨會黃彬將瓜鎮防務布置妥協親督師船會剿以防竄逸並調副將劉成元等步隊移紮揚防後路又將總兵王萬清所部川勇調紮前敵接應觀音山各路復慮下游空虛一面飭令吳全美督帶師船駛往布置聯絡聲勢一面飛飭喬松年督同各屬團練嚴密防範正在調度間探報江南大股逆賊連日

由中關上流渡過九洑洲該處陸營兵力不支賊遂以一股牽掣我軍礮船餘股盡由陸營扼紮處所另起浮橋渡過江北築壘又在河內築土壩數道使我礮船不能深入見在浦口陸營駐紮各地方皆係賊之大道又據總兵詹啟綸稟報忠逆由儀鳳門渡江到九洑洲協同八僞王賊眾七八萬過江自浦口直抵江浦一帶屯紮寶塔根及卸甲店均有賊蹤此次逆賊多係薙髮扮作兵勇並聞另有賊眾數萬屬集七里洲各等語查江北地廣兵單在在可慮見惟有嚴飭水陸各軍設法堵剿勿稍疏虞 上諭議政王軍機大臣等蘇浙諸賊酋因官軍偪攻金陵老巢大舉來援號稱數十萬意圖吞噬各營合犯上游賊計甚爲狡惡經曾國藩飭令曾國荃等督率各營將士以孱病之餘當窮兇之寇苦守力戰四十餘日出死入生竟能力挽危機保全大局詳閱摺中所敘戰狀



各營將士堅忍奮力謀勇兼施殊堪嘉尚金陵各營立腳已定仍應嚴密防守徐圖進攻之策惟僞忠逆回蘇之後仍復分黨畱守金陵並分股力攻九洲官營李世忠親督所部竭力堵剿未知能否抵禦甯國旌德同時喫緊鮑超張運蘭朱品隆諸軍尙屬羸病之餘卽著曾國藩照所擬速飭何紹彩等營赴援甯國保護水陸運道王文瑞周萬倬等軍赴援旌德迅解城圍該大臣前有請簡大臣幫同會辦之奏曾經寄諭優加慰勉茲復據奏嚴樹森有皖北等處統歸該大臣調度之奏恐致顛蹶仍請簡派大臣會辦稍分責任俾得專精圖報等語自屬實在情形亦見該大臣不自滿假之忱朝廷倚任賢能惟期於事克濟嚴樹森所奏請將皖北各軍統歸曾國藩調度通籌緩急未嘗不有所見第以時事方艱金陵甯國均經喫緊曾國藩本節制四省軍務皖省又其兼轄之

區於軍情緩急自必隨時籌及兼顧而皖北各軍相離稍遠必得有人分統方足以資督率是以將嚴樹森摺畱中未卽照允李續宜請假回籍疊經寄諭迅回署任毋庸定俟百日假滿之期尙未據有覆奏見在袁甲三業已回籍唐訓方甫到臨防皖北勦捻正當喫緊苗練復時形叵測著曾國藩卽行咨催李續宜剋期遵旨迅回署任於督辦皖北軍務更必可資得力該大臣亦可相資臂指分任其難以求有濟至苗沛霖之黨忽將駐防潁壽湘軍出外樵採之人擄殺意在挑釁稱兵且欲使南北兩軍不和實爲洞見肺肝惟該大臣所擬將壽州正陽關之湘勇撤出將霍邱防兵抽出調至廬州巢縣一帶仍屬未可輕動壽州一城僧格林沁所部見當勦捻甫能得手之際亦斷不能分兵駐防本日業經寄諭僧格林沁令其將苗練因何擄殺湘軍採樵之人嚴加詰問隨機鈴

東將曾國藩原片鈔給閱看並令交出爲首滋事之人嚴加懲辦使鬼蜮之謀無所於施蔣凝學等軍仍著駐紮壽潁如果苗黨再有擄殺挑釁等事隨時嚴詰毋任漸生兇狡苗沛霖名爲反正既歸僧格林沁節制曾國藩亦卽可給與札文加之訓誡詰其擄殺樵採之湘軍究屬何由並兼與僧格林沁隨時咨會辦理情形破其奸計該大臣等均屬公忠體國其中無隔閡之處朝野咸知要常至誠坦示一氣聯絡則外間所有妄加揣測勦撫異議之浮言及一切欲相媒孽之伎倆自無所用其簸弄張運蘭所部已派易開俊劉松山分帶張運蘭係福建臬司實缺人員見經因病回里調養而甯國軍情正當緊要該員久在行間頗資得力著曾國藩仍飭調理痊可卽行回營毋任稽延正在寄諭間據都興阿奏報江南大股逆賊會合九洑洲踞匪出竄江北情形一招據稱賊由

中關上流渡過九洑洲該處陸營不支賊遂以一股牽掣我軍破船其餘股眾盡由陸營處所另起浮橋渡過江北築壘又在河內築起土壩數道使我破船不能深入又據總兵詹啟綸稟報僞忠逆由儀鳳門渡江到九洑洲協同八僞王賊眾七八萬過江自浦口直抵江浦一帶屯紮此次逆賊多係薙髮扮作兵勇並聞仍有數萬賊眾麇集七里洲等語逆賊不能逞於金陵勢將圖竄江北李世忠所部攻擣九洑洲及防守江浦浦口恐未必能嚴密均在意計之中昨據李鴻章奏報金陵解圍曾國荃卽飭常勝軍進攻九洑洲此時賊竄渡江是否常勝軍業已進攻逆眾被擊竄走抑或因李世忠之軍戰守未能得力所致江北之防關繫緊要如令逆賊紛竄深虞有妨大局都興阿總與李世忠齟齬恐未肯派兵援應本日已諭令該將軍勿存成見速撥援兵以冀保全大局仍

著曾國藩督飭李世忠所部務將江浦浦口嚴密固守毋任賊得乘閒久踞蔓延其白齊文所統之常勝軍並飭曾國荃激勵協力戰守迅將賊架浮橋及河中土壩速行奪毀毋恣憑陵是爲至要將此由六百里諭令知之○諭曾國藩奏擬將駐防潁壽等湘營撤調廬巢一帶等語金陵賊援苦戰擊退而皖北和含巢廬等處本慮空虚據曾國藩奏稱蔣凝學等駐防潁壽之湘營忽於十月初六等日被苗沛霖之黨將其出外樵採擄殺十餘人並據蔣凝學鈔呈苗黨上僧格林沁稟稿請由僧格林沁撥兵與壽春鎮李璋同守壽州將楚師撤出等情曾國藩以湘勇駐防壽州與苗練相逼苗黨意存挑釁不與校量恐其復以前此施於孫家泰等故技構怨無已將欲聲罪致討又恐礙僧格林沁撫苗勦捻之局擬將壽州正陽關之湘勇撤出並將霍邱防兵抽調廬巢一帶其壽

州一城卽請僧格林沁派兵駐防並稱該大臣自問與僧格林沁毫無隔閡而外間疑有勦撫議論不合之處苗沛霖肆其簸弄必使南北兩軍不和故欲調出湘勇爲思患豫防之計本日業經寄諭曾國藩以僧格林沁勦捻喫緊斷不能復分兵駐防若因無兵可分竟交與苗練駐守恐日久又成尾大不掉之勢是蔣凝學等湘軍仍應駐紮潁壽以爲互相鈐制之計該大臣等均屬公忠仍將辦理情形隨時咨會務須至誠坦示一氣聯絡其苗黨擄殺湘勇事出情理之外卽著僧格林沁嚴加詰問如果有心挑釁是並不能遵守僧格林沁節制叛逆復著當諭以朝廷寬宥不能再三曲徇並著將爲首滋事之人送出究辦若始終桀驁卽當告以必與楚軍合力痛加勦辦悔之無及本日寄諭曾國藩亦經諭令酌量給札責問該大臣等同抱忠赤之懷朝廷咸知諒必能相聯一

氣妥籌辦理不至爲狡謀所構難也曾國藩原片著鈔給閱看將此由六百里諭令知之○諭鄭元善奏賊蹤距豫稍遠舞陽土匪蠢動並克徐范等寨及收復明港收撫興集寨出力各員請獎各摺片汝寨各軍連克徐范馮各寨陳大禧張鳳林諸股賊勢日形窮蹙我軍正可乘此聲威直擣該逆老巢以期殲厥渠魁著張之萬懷遵前旨迅卽馳赴汝州駐紮接統鄭元善之軍妥籌調度如必須進駐汝甯親督張曜余際昌等進剿方能得力並著相機辦理務將陳大禧等老巢合力攻拔俾汝郡迅就肅清角子山捻匪李合等結夥肆擾舞陽遂平汝陽知縣王元緒會營剿捕見經鄭元善派副將劉車龍統率所部前往舞陽會剿卽著飭令該副將會合民團速圖撲滅毋令日久蔓延粵匪見由浙川全股竄赴鄧陽該逆去豫較遠著張之萬嚴飭各軍實力堵禦以杜該匪回竄

之路若再有粵逆回擾豫境惟各該地方官及在防各員是問明  
港之匪與陡溝之賊互爲犄角明港雖已收復難保不勾結陡溝  
之賊再圖肆逞並著督飭將弁將陡溝等處之賊剋期殄滅務絕  
根株鄭元善另片奏請將剿匪得力之鎮道懇恩獎勵除將李續  
燾一員降旨照所請給獎外其蒯賀蓀一員所請交軍機處記名  
遇有河南道員缺出請旨簡放之處覈與新定章程不符惟既據  
奏稱該道戰績卓著未便沒其微勞著張之萬存記遇有河南道  
員缺出若蒯賀蓀實堪勝任准其奏請簡放以示鼓勵鄭元善見  
在駐紮汝郡督剿張之萬未經接辦之前仍當認真辦理不得以  
交卸在卽稍涉鬆勁本日據英桂奏疏通鹽路以裕餉源等語京  
協各餉均以山西爲大宗該省餉源日竭入不敷出如潞鹽能在  
豫省暢銷於餉項大有裨益著張之萬督飭各軍實力防剿毋令



髮捻各逆再行肆擾庶晉省鹽路疏通得以赴豫暢銷以裕餉源而維大局將此由六百里諭知張之萬並傳諭鄭元善知之○予山東殉難知縣李鳳韶等祭葬世職○戊午左宗棠李鴻章奏八月間上虞賊匪竄踞泗門馬渚復分股立卡澣山沈山頭等處慈谿餘姚警報日至據甯紹台道史致諤稟報暫畱已革道員張景渠赴餘姚帶勇進剿會商英國總兵哇樂德克稅務司日意格派撥輪船並調遊擊吳長安等師船分扼丈亭太平橋姚江等處又抽撥綠頭勇協同遊擊李光張其光等軍嚴守慈谿並調法國總兵勒伯勒東赴餘姚整隊以待日意格亦帶兵同往張景渠部署各軍令中書謝錫蕃帶勇會同法國參將買忒勒德格北先赴泗門約會民團力防內竄李光張其光各帶七成隊伍由澣山一路兜剿已革護提督陳世章等督兵勇畱守餘城九月二十七日勒

伯勒東日意格帶領兵勇協同同知銜謝采嶂等直擣上虞州同謝國恩等帶勇援應各路賊知官軍徑趨上虞遂分黨由泗門馬渚翻山先撲餘姚至北門外紅米山謝國恩等各率所部占山後包鈔夾擊知縣莊鳳威等帶勇策應斃賊前隊數十名該逆後隊併進吳長安等從山坳左右殺出謝國恩等從山頂馳下四面合勦縣丞查廷楨奮勇當先中礮陣亡各軍力戰斃賊目一名賊眾三四百名生擒四名姚江各船開礮助勢該逆向西北遁去二十八日勒伯勒東等偵知餘姚敗匪退向虞城遂自三十里牌至姚村下壩節節進勦連破賊卡十四座斃賊無算張景渠亦親督各隊馳至二十九日我軍至謝家橋該逆守卡抗拒勒伯勒東日意格揮兵偪卡連放炸礮轟斃賊匪及落水死者約千餘人乘勝踏毀通明堰賊卡二座三十日我軍直薄上虞城下日意格躍馬當

先陡中槍子負救回營十月初一日勒伯勒東以大洋礮轟塌土城城上槍礮如雨我軍奮勇登城砍倒守垛悍賊餘賊從西南兩門逃竄當將上虞縣城克復其沈山頭許山泗門馬渚之賊亦經李光等合力掃蕩餘姚全境肅清查甯郡兵勇不過萬餘有防不勝防之慮該文武以勦勝於防定計先攻虞邑遂復堅城從此扼守曹江甯郡之藩籬益固進規紹郡金衢之聲氣漸通於浙東大局殊有裨益已革甯紹台道張景渠會督中外各軍不避艱險攻克堅城可否懇恩暫緩拏問准予畱營以觀後效陣亡縣丞查廷楨應請飭部從優議卹其餘出力員弁紳董及傷亡兵勇另行查明奏請獎卹再嵎縣新昌兩城據史致諤稟報已於十月初五初六等日相繼克復俟查明詳細情形另行具奏 上諭內閣左宗棠李鴻章奏中外官軍克復上虞縣城並乘勝攻克嵎縣新昌各

城一招此次勒伯勒東自受中國總兵職任卽能踴躍用命稅務  
司日意格奮勇爭先身受槍傷均能陷陣摧堅克稱厥職實堪嘉  
尙在事文武員弁亦能和衷共濟勦辦得手仍著飭令各軍並督  
同總兵勒伯勒東所部進攻紹興郡城迅圖克復其嵎縣新昌克  
復詳細情形並著左宗棠李鴻章查明具奏○諭議政王軍機大  
臣等據文煜奏冠縣降眾張錫珠等沿途滋事因官兵追勦由廣  
宗逃回邱縣一帶見分飭堵禦等語此股匪徒據稱係由鉅鹿威  
縣追勦竄入廣宗東董里一帶往來竄逸見又逃回山東邱縣之  
乾集村該處與直境之威縣南宮曲周平鄉等處接壤尤應嚴防  
北竄見在直東騎馬賊匪並未剪除淨盡若不將此股匪徒趕緊  
勦滅萬一北竄致令與馬賊勾結該督等又將何以措手遮克敦  
布見已飛飭北路各該地方官先期防範仍著迅撥兵勇馳赴威

縣邱縣一帶會合各路兵勇剿擊文煜於春閒卽操演精兵五百名此時已成勁旅卽著選派得力員弁管帶此項官兵馳往該處會合遮克敦布派出兵勇迎頭截擊其大名鎮道及接壤之天津正定各鎮汛所屬附近地面均著文煜飭令該地方官嚴密堵禦不准稍有鬆懈並著崇厚選派兵弁會同協力堵禦務將此股悉數殲除勿得任令紛竄致干重咎將此由四百里各諭令知之○左宗棠奏自官軍奪獲游埠湖鎮等隘當令劉典駐紮游埠兼扼湖鎮臣親督各營攻龍游於西南兩門外開掘長濠引水灌之復搶築三壘於東門外寶塔嶺以瞰賊巢九月初十至十月初二等日疊次偪攻破其傍城一壘蔣益澧督湘軍閩軍圍攻湯溪九月十二至十月初三等日疊破賊壘數座劉典擊敗蘭谿金華援賊後復與魏喻義分剿蘭谿嚴州附城踞匪均獲勝仗總計大小數

十戰破賊壘賊卡三十餘處殺悍賊六七千名賊目近百名惟各城及附城諸壘堅不可拔每次進攻輒傷精銳緣猾賊知官軍不可力敵遂以死守城壘穴牆開礮爲得計城壘之外濠溝深闊木椿密布官軍偪攻愈猛傷亡愈多而龍游湯溪兩城爲金華要道必兩城下後路清而後可攻金華蘭溪一水直達嚴州又必蘭谿下餉道通而後可攻嚴郡近訊獲賊知龍游城壘油鹽薪炭俱缺見已拆屋爲炊賊眾雖多能戰者不過數千所以堅守不去者意在戀其輜重且恐棄城出走更難倖免是以忍死待援湯溪賊勢相同臣見密飭各營於賊所可竄處所放哨設伏斷其接濟截其去路一面調取大礮購覓炸彈再行進攻蔣益澧一軍屢奉諭旨令赴援金陵大營見在金陵疊獲勝仗大營漸臻穩固蔣益澧自可無庸往援俾得專意攻剿湯溪該處祇一城一壘已設法開鑿

地道迅圖克復劉典一軍駐紮太平及湖鎮之間專備截剿嚴州  
蘭谿援賊如逆首李侍賢由金陵回援則應由臣軍及蔣益澧派  
隊助剿魏喻義所部仍分駐淳安西銅關及壽昌縣城以防嚴州  
蘭谿賊匪內犯飭前駐遂安之王文瑞率所部踰嶺過婺源進駐  
歙休交界之草市嶺以固婺而援徽調江西撫臣派來助剿之王  
沐一軍代守遂安以扼江皖之衝俟龍游湯溪兩城有一克復則  
局勢稍活其布置分合之宜隨時酌辦 上諭左宗棠李鴻章奏  
中外官軍攻克上虞縣城一摺已明降諭旨宣示矣惟據法國哥  
士耆函致總理各國事務衙門言及克復該城係先在城外蹋毀  
賊營奪橋焚卡中國官兵以少勝多頗稱得力惟轟城竟日而城  
中絕無動靜遣人往視始知賊已宵遁等語與此次所奏官兵奮  
勇登城賊由西南逃竄情形不符與外國人共事全在孚以誠信

若稍有粉飾卽爲所笑史致謬等稟報軍情沾染軍營惡習必須嚴加訓飭庶可力挽頽風並飭令嗣後務須據實詳報不得一字虛假以杜外國口實張景渠前次棄城而逃並有侵帑情事此時豈得遽請暫緩拏問准令畱營仍著李鴻章左宗棠查明該革員隨同克復各城是否認真出力及從前甯波失守情形據實具奏江南大股逆匪會合九洑洲踞匪出竄江北屯紮於江浦浦口一帶其勢甚張見在白齊文已由甯波帶勇回至松江卽著李鴻章催令趕緊調齊人數兼程進發迅速入江如能將九洑洲等處克復不獨江浦之賊不勦自退卽長江亦可疏通於大局甚有裨益勒伯勒東業經左宗棠發給札憑令其統率一軍惟以洋人教兵領隊流弊極多朝廷前此有准減不准增之諭左宗棠所陳各情與朝廷之意脗合想該撫等必能遵旨妥辦也曾秉忠一軍旣已



漸知倣畏並無縱兵通賊情事著准其暫畱滬防協同黃翼升實力防剿至滬上釐捐事務經李鴻章派令王大經等認真整頓每月所入可得二十餘萬兩各軍賴以接濟具見該撫辦事實心綜覈精當仍著隨時釐剔務令稅務日見其增庶於餉糈有裨金鴻保既知刻厲自新卽照該撫所請暫畱釐局仍著畱心查察如有貪婪確據卽予嚴參龍游湯溪等城攻剿屢獲大捷而賊壘尙堅每戰必傷精銳左宗棠擬一面斷其接濟一面調取大礮購覓炸彈轟攻城壘所籌甚是卽著設法購買運往應用以制賊死命湯溪地道是否趕辦完竣如能迅下兩城則金華蘭谿一水可達方有進兵之路此時上虞旣復嵊縣新昌亦相繼而下浙東大有轉機著左宗棠飭令史致諤等會合中外各軍迅速進兵規復金華紹興各郡縣以牽賊勢該撫謀畧素優於進止一切機宜必能調

度合宜也。徽防關緊要，王文瑞駐守草市一軍，及王沐駐防遂安一軍，仍當嚴飭該員等實力扼守，隨時策應。以爲該撫後路聲援。將此由六百里各諭令知之。○諭勝保奏督兵剿辦王閣村回匪，連日獲勝，並咸陽接仗情形，及請飭多隆阿分剿回匪各摺片。據稱同屬回匪兇悍，善鬪，見在連次進剿，斃賊二千餘名。該逆始竄過洛河，勝保擬催調黃得魁等所部進擣王閣村老巢。自應如此辦理。著卽相機進剿。節節前進，毋稍遷延。該大臣等旣親赴前敵攻剿，萬緊自未便遽回潼關。熙麟尙未赴任，准其暫畱坐鎮涇陽之圍，已鬆而鳳翔正值危急，當正綰所部兵力甚單，勝保務當兼顧。所稱新募四營見在訓練，已否可用，並著察看酌調，以資攻剿。多隆阿分剿陝回，本係夏間所降諭旨，因值荆子關髮逆分竄，該將軍追剿回豫。此時多隆阿尙未入關，俟該將軍抵陝後再行

酌量候旨遵行另片奏餉需支絀請於山西協餉十萬兩內截撥五萬兩解交該大臣軍營等語所奏亦係實在情形著瑛瑩於山西解到後卽隨時分撥一半解交勝保軍營以資接濟其另片所奏請畱蕭宗幹在營差遣該員係黔省知州迹近規避與新定章程不符惟陝省差委需人著准其暫畱交穆騰阿差遣將此由六百里各諭令知之○諭勝保奏漢南官兵剿賊獲捷及分兵防範川匪等語藍逆占踞洋縣日久經毛震壽飭令易佩紳與羅亨奎等掩擊獲勝藍逆幾致成擒見復死拒不出曹逆一股竄至石泉之銅車壩滋擾郭逆殘匪又由徽縣西走橫川是漢南逆匪兇燄未衰徽縣迤西卽近甘省尤慮勾結爲患前因風聞毛震壽所帶川勇甚不得力曾諭駱秉章確查酌辦是陝南見在兵力不盡可恃勝保駐軍同州一帶尙覺賊眾兵單不敷分布且相距較遠尤

有鞭長莫及之勢川省軍務漸次肅清著卽迅派得力將弁統帶勁旅與易佩紳等合力兜剿將徽縣一帶竄匪悉數殲除洋縣城池迅圖攻拔務期陝南地方早日廓清毋得稍存畛域致令曹藍二逆及郭刀刀等匪蔓延陝甘邊境日久爲患已革知縣羅亨奎因有擅殺同官之案曾經諭令該督提省嚴訊見尙未據覆奏何以勝保此次奏稱羅亨奎在陝南帶兵剿賊是否該革令尙未提解到省仰其中別有情節並著查明據實迅速具奏將此由六百里諭令知之○己未諭議政王軍機大臣等前據張之萬奏請變通河南折漕以裕倉儲當經交戶部速議具奏茲據該部奏稱張之萬所陳折漕銀數與河南歷年辦理成案加增一倍有餘於倉儲軍需及本省辦公經費均有裨益應照所請辦理等語河南應徵正耗額漕薊糧共計三十餘萬石前據鄭元善奏稱本年秋收

嚴計通省僅止五分有餘顯係輕信州縣豫圖遷延該署撫於抵豫後卽能將歷年漕弊不避嫌怨據事直陳自必確有把握見在庫款支絀情形張之萬甫由京外任自能深悉著卽照戶部所議督率各屬趕緊徵解務於年內埽數解清毋任各州縣藉詞延宕嗣後該署撫遇有關涉國計民生務宜隨時體察情形實心實力勿倦推行將此由四百里諭令知之○予告大學士彭蘊章卒予祭葬諡文敬○庚申諭議政王軍機大臣等馮子材魁玉奏鎮防近日軍情並上游探報情形一摺湯岡肅清之後逆黨遁回句容等處於附近村莊擄糧運送金陵老巢復於句容六里店亭子地方分黨四掠擾及高資炭渚等處經馮子材等飭派總兵陶茂森副將關松志等軍奮擊掩殺餘賊遁回亭子逆蹤飄忽狡計四出馮子材等於鎮防戰守尙能盡力妥辦仍應嚴密備禦督令鎮防

官兵相機剿擊毋以逆氛少挫稍涉大意其炭渚高資等處不得任賊築壘分屯窺伺江防致驅除又形棘手所稱僞忠侍對納諸逆黨數萬由九洑洲北渡浦口一帶已有賊營屯紮勢頗鴟張著曾國藩等仍遵前旨飭令李世忠所部實力堵剿都興阿等於分防水陸各軍及通泰各處隘口督飭在事各員併力嚴防江浦浦口情形危急卽派撥勁兵前往援應以免疏虞至北渡逆黨謀竄皖北廬州和州及江浦六合以犯上游計將牽掣金陵大營官軍得以乘虛復撲諒曾國藩成算在胸必能豫爲部勒有備無患使賊狡計無所施也吳煦已抵鎮營仍著飭令督率常勝軍與江面師船速卽攻取九洑七里等洲並著都興阿馮子材等於南北兩岸應卽如何聯絡策應妥籌辦理俾速奏功實深殷盼將此由六百里各諭令知之○辛酉諭內閣詹事府左中允錢寶廉奏請飭

各大臣督撫不得將降革獲罪之員率行請畱請調等語朝廷賞罰一秉大公凡係降革獲罪人員必其咎有應得始予罷斥近來緣事久經黜退之員往往謀入軍營希圖奏畱奏調爲將來開復起用地步雖其中不盡無可用之人而庸劣各員夤緣巧借者居多一經畱調始則謀據要差繼則濫竽薦牘甚至把持要挾無所不爲其實在出力人員轉因之壅蔽擠排末由自效何以明懲勸而肅官常嗣後各路統兵大臣暨各直省督撫務當破除情面認真釐剔凡降革獲罪之員必其人實有才能超卓人地相需者始准臚陳事蹟專摺奏請仍由該部將該員帶領引見候旨遵行不准僅以差委需員摭拾虛詞率行請畱請調以徇濫而杜詭隨

○僧格林沁國瑞奏臣等進攻集賊寨逆首張落刑句結藍白各旗擒首率黨二三萬人麇集河南北兩岸欲與官軍死戰連

日探報賊漸北趨十月二十八日臣等派翼長舒通額等各率馬隊迎剿擊敗北岸逆眾及東路援賊南岸之賊亦卽退走是役斃賊四千餘名蔣集擒首陳萬幅因援賊累敗勢極窮蹙於二十九日畏罪南遁其弟陳萬祥來營乞降臣等派營總常山保往該寨查看所有被脅之人俱已一律薙髮自應仰體 皇仁准予投誠飭令署潁州府知府博銘妥爲安撫十一月初一日臣等督軍進攻馬村橋賊巢該寨牆高濠深用炸礮轟擊焚寨內房屋數處賊仍堅守我軍撤隊誘敵離巢奮力衝擊擒斬多名餘匪遁回查張落刑疊次糾黨北來抗拒見在敗遁回巢我軍肅清北岸後移營進剿難保該逆不情急南竄臣等已咨行吳棠唐訓方鄭元善毛昶熙一體偵探實力堵截毋任遠遁營總富和帶領馬隊駐紮永城疊次迎剿零星擒匪收復數圩探聞擒首李城糾約宿永各圩



捻黨欲竄山東打糧或至清江擄掠除嚴飭富和偵探勦辦外並札飭德楞額一體慎防遏其竄突黃開榜整隊聽調以備截擊再見在收復各寨亟須妥籌安撫署亳州知州劉蘭馨才具不甚開展難期獨力辦理署潁州府知府博銘既非實任且交卸在邇誠恐呼應不靈臣等查得署安徽布政使馬新貽人尙諳練熟習皖省情形應請旨飭下唐訓方傳諭該員迅赴亳州妥辦安撫事宜以重地方又奏近據派出查探苗練之人回營稟稱該練見紫展溝攻勦捻圩屬實又據苗沛霖稟稱自到展溝各圩俱獻捻匪泚河迤南一律薙髮雖破牛圩李圩未獲著名捻首見在進攻宋小愚賊圩泚北亦有來投者三義集練圩生擒匪犯張蘭勦因傷重不能送案或就地正法等情當經臣札飭苗沛霖卽就近將張蘭勦解交鳳臺縣或蒙城縣訊明稟覆以憑覈辦仍責令苗沛霖實

力剿擒又據道員黃元吉稟稱參將曹福雲欲照勇丁虛數支領口糧並抗令不赴前敵隨於軍前正法等情臣查曹福雲卽有前項情事亦應稟明辦理黃元吉以道員擅將該參將正法殊出情理之外已由臣札飭廬鳳穎道查訪稟覆覈辦見黃元吉所帶兵勇陸續潰散賊勢益張朱圩各寨匪黨在沙河南北肆擾經臣飛札道員蔣凝學帶領兵勇就近剿辦以免滋蔓再副都統博崇武見已到營應卽畱營差委上諭議政王軍機大臣等官軍進攻將集捻巢逆首張落刑句結藍白各旗捻首孫醜兒姜台凌等率黨麇聚渦河南北兩岸欲與官軍拌死一戰經僧格林沁督飭翼長舒通額等軍迎剿斃賊甚多蔣集賊勢窮蹙捻首陳萬幅南遁其弟陳萬祥率領寨中脅從悔罪投誠辦理甚爲得手其劉集池東馬村橋賊寨負隅亦經官軍進攻誘擊出拒賊匪甚多仍著僧

格林沁乘勢督軍迅速進攻惟逆首張落刑等疊次糾黨北來迎拒均經擊敗回巢指日官軍將渦河北岸肅清移營前進直擣其巢勢必窮極鋌走復圖滋蔓卽見在陳萬幅遁走亦必須嚴行追捕務絕根株前諭皖豫清淮各軍大軍進擣擒巢之際東南西面各專責成齊力兜擊見在僧格林沁之軍自北而南節節進剿業將近偏巨捻老巢卽著吳棠張之萬毛昶熙唐訓方等各率所部嚴行備豫並著隨時勤密偵探一有賊由何路竄逃之信卽行迎擊毋令賊得乘閒遠颺陳萬幅旣係南遁勢必逃往清河一帶附近地方正當髮逆渡江北竄吳棠尤應嚴督各地方及各帶兵員弁迅速搜捕毋使竄匿勾串又致死灰燎原僧格林沁奏擒首李成糾約宿永捻圩定期欲竄山東打糧或至清江擄掠等語僧格林沁仍飭富和嚴密偵探督兵追剿德楞額一體嚴防並著吳棠

隨時偵探堵剿其德楞額被參各款據僧格林沁查明多屬不實  
且據知縣張振榮呈稱譚廷襄所參各款與原稟不符軍營剿賊  
與地方稟報偶涉歧異及難免民練怨尤之處雖亦時有此次德  
楞額債機失事固屬咎有應得且其帶兵日久無功輿情不治又  
豈能曲爲原宥僧格林沁仍應嚴督該革副都統力圖振刷奮勉  
立功毋再遷延貽誤致干重罪東省兵餉自應隨時接濟並本省  
官兵應與如何相爲策應之處著譚廷襄仍遵屢次諭旨妥籌辦  
理不准稍涉鬆懈皖豫一帶收復各寨亟須良有司妥爲安撫屢  
經諭令該撫等慎選賢能前往妥辦茲據僧格林沁所奏署亳州  
知州劉蘭馨辦事遲延才具亦不開展何以輒令署理此等緊要  
地方潁州府遺缺係簡放全陞該省揀員調補係屬何人署知府  
博銘雖於皖境尙稱熟習但非實任卽恐呼應不靈著唐訓方卽

飭署安徽布政使馬新貽迅卽前赴亳州督同博銘將該處一切安撫事宜妥爲辦理博崇武旣已到營亦無經手要事卽著僧格林沁飭令來京黃元吉於參將曹福雲欲照虛數支領勇糧及抗令不赴前敵等情卽使屬實何得並不稟報輒將該參將擅行正法殊出情理之外旣經僧格林沁札飭廬鳳潁道查訪稟明覈辦卽著唐訓方督飭該道務將黃元吉擅殺等情確切查明辦理黃元吉部勇業經潰散所有朱圩各寨賊匪肆擾沙河南北並著唐訓方飭令蔣凝學之軍就近剿辦毋令鴟張苗沛霖所稟三義集綠圩生擒匪犯張蘭勳傷重不能送案等情該大臣飭將張蘭勳解交鳳臺或蒙城縣訊明覈辦自屬周妥苗練所獲匪首必係真正積惡兇渠著僧格林沁飭令苗沛霖卽將張蘭勳一犯解交該大臣軍營抑或咨會唐訓方仍交鳳臺蒙城縣地方訊辦均著僧

格林沁酌度辦理所有亳州渦河南北一帶山川道路民圩捻巢及官兵駐紮處所著僧格林沁繪圖貼說詳細陳奏又鄭元善奏收復白楊樹寨進攻李樓一摺項城白楊樹寨劉紹祿等股匪與汝甯陳大潛等股勾結披猖鄭元善調派參將尹嘉賓所部乘閒收復捻斬甚多並將捻首李金棠生縛所辦甚好著張之萬卽飭尹嘉賓等速將李樓乘勝攻克劉紹祿等匪悉數殲除將此由六百里各諭令知之○嚴定盜案起贓章程○壬戌諭內閣前因陝西回匪猖獗特命勝保以欽差大臣督辦陝西軍務責重任專宜如何迅掃賊氛力圖報效乃抵陝已經數月所報勝仗多係捏飾且納賄漁色之案被人糾參不一而足實屬不知自愛有負委任勝保著卽行革職交多隆阿拏問派員迅速押解來京議罪不准逗留多隆阿著卽授爲欽差大臣所有關防卽著勝保交多隆阿

祇領所部員弁兵勇均著歸多隆阿接統調遣○諭議政王軍機大臣等前因勝保督辦陝西軍務驕恣欺罔日久無功疊經密諭多隆阿回軍入陝於行抵潼關卽行馳奏茲據多隆阿奏後隊已抵陝州卽可進紮潼關等語覽奏深慰廑懷勝保以欽差大臣督辦陝西軍務宜如何恭行天討上紓朝廷西顧之憂以期救民水火乃自到陝後卽捏報勝仗賄賂苞苴荒淫漁色如王天保閻丕敏廖慶謀等皆係獲罪之員勝保竟敢收諸幕下代爲嘵嘵奏辯視諭旨如弁髦膽大妄爲莫此爲甚其疊次被人參奏各款蹟業經僧格林沁等查明屬實朝廷原不難立予拏辦因彼時無人接統其軍是以暫予姑緩今多隆阿親督大軍卽日行抵潼關卽著多隆阿傳旨將勝保革職拏問派員迅速押解來京議罪不准逗遛多隆阿著卽授爲欽差大臣接領關防任事另發去明發諭旨

一道多隆阿於接奉後即可欽遵宣示辦理勝保所部半多降眾不遲之徒著多隆阿一面拏問勝保一面設法安撫其眾明白宣示俾知朝廷祇逮問勝保一人其部下將卒概行免究仍隸多隆阿麾下殺賊立功量予保奏以安其心勝保拏問解京以後著多隆阿即將勝保各款詳細訪查據實參奏其營中文武諛諛勝保聲名最爲惡劣者並著多隆阿商同李宗燾查訪確實如戴鸞翔賈型等擇尤懲辦以儆其餘至宋憬詩劉占考等皆帶有降眾素不安分多隆阿當設法駕馭恩威並用不可稍涉大意以上拏問勝保駕馭降眾一切辦法惟在多隆阿先事詳細籌畫妥協卽行遵旨迅速辦理不可遲緩尤不可稍露風聲致未辦之前或生枝節拏辦勝保以後一切撫綏彈壓及進兵機宜均須妥籌布置不可稍有疏失熙麟見在潼關似可將守禦事宜交付該督多隆阿



卽行酌帶兵勇親赴同州接統勝保之軍出疾雷不及掩耳之計較爲妥善如勝保抗不遵旨始終跋扈多隆阿卽將其正法軍前亦不爲過將此由六百里密諭知之○諭耆齡奏圍攻湯溪踴毀賊壘進取武義並撥兵援剿臺灣逆匪各摺片湯溪爲金華門戶見經閩浙各軍痛加剿洗賊勢已蹙諒可不日得手卽著耆齡飭令康國器等隨同蔣益澧迅拔堅城以期進攻金華林文察已抵李村偪攻武義並著催令迅速攻克得以併力南下該逆勢不能支圖竄遂昌松陽以爲牽掣我軍之計實在意中著該督嚴飭曾元福等分投防範毋稍鬆懈斗六失陷情形前據徐宗幹奏報已嚴諭設法進剿可見在事將弁前報賊黨窮蹙各情全不足信見經耆齡派令關鎮國等管帶師船並添派陸兵三百名前往是否足敷剿辦斗六地處緊要密邇臺郡斷不可任其日久遷延曾元

福兒雖未能抽調仍著該督察看軍情妥爲調度並嚴飭在臺各將弁迅圖肅清如有不得力者從嚴參辦恐該郡孤懸海外該將弁等恃督撫不能覺察肆意欺飾耆齡務當畱心察訪會同徐宗幹隨時整飭以期剋日蕩平署金門左營守備黃炳南派令管帶師船中途折回實屬不知緩急且難保無畏葸不前藉詞逗遛情事著先行革職解省交耆齡徐宗幹嚴行審訊如有捏詞延玩等情卽行從嚴參辦秦如虎見未銷假惟甯波防務緊要著卽催令剋期就道馳赴甯郡接署提督印務毋得稍涉遷延致干咎戾將此由六百里各諭令知之○諭張凱嵩奏籌辦蓮塘軍務情形一摺蓮塘山勢峻險路徑紛歧張逆盤踞其中實爲桂平兩郡肘腋之患見在修仁縣城業經收復該逆懾於軍威由老縣以至桂嶺挖掘長壕十餘里希圖抗拒著張凱嵩恪遵疊次寄諭嚴飭在事

文武激勵諸軍合力攻勦務將積年巨匪迅速殲除如該員弁等有畏葸退縮情事卽著該撫從嚴參辦以整戎行至粵西士民久苦兵燹各地方團練自必激於義憤志切同仇該撫業經札飭各官紳大集練眾協力助勦仍當於策勵之中寓撫綏之意俾該紳民等知感知奮會合兜圍以助官軍所不逮則勦辦自易得手劉長佑駐軍潯州應俟劉坤一到潯後方可交卸東下著張凱嵩迅催該司星速赴潯該撫關防自不難剋期齎到以重職守近來封疆大吏往往瞻徇情面遇有府廳州縣等缺酌量肥瘠爲人擇地並不爲地擇人以致吏治日非民生日蹙積習相沿殊堪痛恨張凱嵩由知縣不數年間擢任封圻受恩甚重務當振刷精神力圖整頓屬吏中有循良稱職才能出眾者自應隨時保奏以備錄用其庸懦無能及貪劣不職之員卽著據實嚴參以肅吏治斷不准

稍事姑容致負委任勉之懍之將此由五百里諭令知之○諭直隸舉行保甲○諭瑞麟嚴緝熱河匪徒○撥山西銀三萬兩備多隆阿軍需○癸亥諭議政王軍機大臣等文煜奏道員出境剿賊陣亡遮克敦布奏追剿冠縣匪徒情形各一摺秦聚奎奮勇剿賊遇伏捐軀大順廣一帶失此賢員殊爲可惜此股匪徒有馬賊千餘名步賊二三千名斷非倉卒可以招集文煜身任封疆毫無備豫可謂形同疊嶂遮克敦布專辦直東防剿事宜徒知粉飾奏報所派巡防之參將王恩第並不認真剿賊致令賊匪橫行本日已降旨將該督等先行交部議處該督等務當激發天良督率員弁兵勇迅將張錫珠等悉數殄滅毋致養癰成患大順廣道一缺關係緊要據文煜奏稱新放貴西道徐志導於剿匪一切尙能諳悉著准其暫行署理飭令星馳前往署任實力辦理防剿勿尙空言

但觀實效儼辦無實際不過希圖暫免遠行卽著從嚴參辦臬司孫治本有捕盜之責著文煜飭令帶兵出省前往館冠一帶會同遮克敦布妥辦防剿馬賊聚至千餘非馬隊不能制其死命文煜前次奏稱添設馬勇三百餘名是否辦齊並著酌量添撥以利追逐其省標官兵五百名卽著催令遊擊阿洪阿迅速管帶起程並著崇厚再於訓練有成之官兵內另挑馬步數百名於前次所保之參將春霖興福各員內酌派數員管帶前往以資得力此次馬步賊匪聚至三四千名其著名兇悍之匪爲數必多誠恐裹脅日眾勦辦更形棘手著文煜等嚴飭帶兵各員迅速籌辦尤應四面兜擊勿令旁竄紛擾致滋蔓延參將王恩第派防河口何以不認真堵截任賊紛竄並著文煜等查明參辦將此由六百里各諭令知之○唐訓方奏據駐紮廬州之總兵石清吉署廬州府知府唐

景皋稟稱九洑洲逆眾竄浦口後乘北岸空虛連陷和州含山巢縣賊氛逼近廬州請撥兵剿辦等情廬州爲安慶臨淮樞紐地勢緊要該逆蓄謀思逞非厚集兵力制其死命則由巢縣西北至合肥定遠西南至無爲廬江處處空虛必形滋蔓查廬郡城垣甚寬僅有石清吉所部四營已屬不敷守禦何能分兵迎剿臣前遣人回楚新募義字三營昨據稟報已抵舒城臣卽飭迅速赴廬歸石清吉調遣以壯聲威第該軍新集必須輔以久經戰陣之師方可痛加勦洗頃准督臣曾國藩咨稱調撥駐紮霍邱之提督蕭慶衍駐紮三河尖之道員毛有銘各率所部進駐廬州該兩軍曾否拔營未有確信查有總兵張得勝打仗勇敢在臨淮軍中最爲得力見奉旨給假省親尙未啟行皖北軍情萬緊自應先其所急臣已令管帶所部四營卽日赴定遠一帶相機進剿合無仰懇 天恩

飭令張得勝仍畱臨軍以資臂助其蕭慶衍毛有銘兩軍見由臣  
檄催星夜來援確偵賊勢何路喫重卽會商張得勝石清吉四面  
兜擊以期聚而殲旃至和含巢縣文武下落俟查明另行辦理  
上諭此次逆匪由浦口屯紮後兩日間疊陷三城情形極爲飄忽  
巢縣距廬州甚近石清吉所部僅止四營自屬不敷守禦該署撫  
新募楚勇已抵舒城雖未經訓練以之守禦尙屬可用諒已催提  
到廬曾國藩所調之蕭慶衍毛有銘兩軍已否前進卽著催令迅  
速前往廬郡以資防剿見在曾國藩所部兵勇屢次分援雨花臺  
及堵禦徽甯等處兵力未厚都興阿素顧大局著派兵溯江而上  
節節會剿毋任滋蔓九洑洲係李世忠之軍圍攻何以任令賊匪  
竄出是否不肯出力抑或兵少賊眾之故著曾國藩等查明具奏  
至巢縣之濡須口和州之梁山處險要是否未爲該逆占踞曾

國藩尤當設法保全彭玉麟等水師應酌調駛入巢湖會合攻剿其南岸蕪湖等處爲曾國荃大營後路更應嚴加防範著曾國藩飭令水師在江面梭巡毋令逆匪偷渡曾貞幹已赴雨花臺大營蕪湖等處防兵是否尙厚甚爲懸系刻下吳煦等所帶之常勝軍計已行抵九洑洲務令將南岸之賊截住竄出之賊四路兜擊迅拔各城盡殲醜類惟在該大臣等隨時相機妥爲調度至此次北竄逆匪必須厚集兵力方能制勝著曾國藩查明實在情形會同都興阿富明阿唐訓方妥籌剿辦此股北竄賊匪究有若干賊目何人如何竄陷和州等處各情唐訓方所奏甚屬疏畧著曾國藩查明具奏總兵張得勝受恩甚渥值此軍務喫緊之時豈可率行回籍著仍畱皖省飭帶所部前赴定遠防剿以資得力李續宜自回湘後已逾兩月本日諭令毛鴻賓迅催起程東下並著曾國藩



函催以資臂助將此由六百里各諭令知之○諭前因山東軍務吏治急切需人整頓是以將閻敬銘賞給二品頂帶署理山東巡撫並諭令官文等選募新勇遴委得力將弁管帶赴東諒該督等必能妥速辦理惟山東幅教各匪日益鴟張該省兵勇單薄不敷分布又無得力將弁統帶屢戰屢挫其勢渙散不可收拾譚廷襄本不知兵又復交卸在即呼應不靈本日據奏棍教各匪勾結出竄進剿兵勇被賊衝退見在兵無可調勇無可增竟致一籌莫展覽奏曷勝焦急東省爲畿輔屏蔽匪眾肆意橫行毫無阻遏實爲腹心巨患閻敬銘赴晉奔喪前次奪情授職本屬萬不得已之舉已諭令移孝作忠迅速赴東省接印任事昨據英桂奏該員見在尙未到晉是否仍在楚省抑或業已起程赴晉著官文嚴樹森查明該署撫見在何處立即飭令趕緊赴東勿得稍事遲留致誤事

機楚省新募勇丁著剋期選練成軍派委出色將弁管帶赴東軍裝口糧著遵奉前旨妥爲籌備楚省文員內有材能出眾可備折衝之選者酌派數員到東聽候閫敬銘差遣俾該撫到任後卽可指揮如意勿虞掣肘該督等務當不分畛域顧全大局是爲至要本日據唐訓方奏九洲賊匪竄陷和含巢縣等城皖北軍情萬緊必須調度有人方不至貽誤大局李續宜回籍後已逾兩月旣遂其奔喪之志並足慰伊父倚闔之情此時事勢艱危該撫受恩深重想不忍忽視著毛鴻賓催令迅速赴皖督辦防剿事宜以副委任毋再遲延將此由六百里各諭令知之○諭譚廷襄奏棍教各匪聯合大股出撲鄒曲一帶連日督軍截剿一摺另片奏莘冠降眾張錫珠等搶掠滋事見在派兵進剿等語東省教棍等匪本不聯屬自鄒曲大軍進逼山寨教匪窮蹙潛與棍幅各匪勾結合

股該匪傾巢而出圖撲鄒縣前敵營盤總兵保德等督率馬隊前往抵禦東路步兵不至保德墜馬受傷該匪乘勢圖撲縣城經員外郎劉錫鴻等馳赴援剿因匪勢太眾致被壓下該逆直至兗城二十里外放火譚廷襄嚴飭各營以守爲戰將該匪逼退見尙盤踞鄒縣西北一帶村莊而捻首李成復有由宿州竄赴山東之信且本日據文煜等奏張錫珠由館陶竄回冠縣道員秦聚奎力戰陣亡是東省軍情萬分喫緊譚廷襄所稱兵無可調勇不能增亦係實情僧格林沁攻剿亳州捻巢正當喫緊惟東省爲畿輔屏蔽關繫甚重兇在賊勢甚爲猖獗若不將各股迅圖撲滅後患曷可勝言著僧格林沁酌度情形如能抽撥得力兵勇前往東省盡力剿洗方能挽回大局其李成由宿東竄之匪卽由僧格林沁迅卽知照吳棠就近飭令黃開榜等軍相機截剿毋令教棍各匪合夥

德楞額前經譚廷襄奏若仍畱東省督兵恐與該撫意見不合貽誤事機應否飭令該革員赴該大臣軍營帶兵自效另派出色將領前來接統其眾並著僧格林沁斟酌辦理該大臣公忠體國素願大局諒必能安速援剿以紓朝廷南顧之憂聞敬銘到任需時譚廷襄責無旁貸仍當振刷精神就見有兵力分投堵剿儻豫存五日京兆之見任令棍教各匪蔓延貽患恐不能當此重咎也翼長海羣是否因骹疾不能帶隊保德是否因墜馬跌傷腰骹東路步兵何以阻於嶧山不能會合馬隊均著譚廷襄確切查明據實具奏張錫珠股匪據文煜等奏馬步約三四千人遮克敦布見在親赴館冠一帶剿辦並著譚廷襄督飭派出之副將文英等會同進剿以靖地方署冠縣知縣李靖何以於張錫珠等毫無覺察率行送至遮克敦布軍營錄用以致乘間逃逸勢燄日張李靖辦

理不善咎無可辭卽著譚廷襄從嚴參辦毋稍回護譚廷襄另片奏進攻淄川踞匪開挖地道藥發太驟未能得手並非據該員稟報之詞含糊粉飾道員陳顯彝奮發有爲任勞任怨洵屬有用之才等語淄川踞匪本不甚多豈容任令久踞旣據譚廷襄奏稱陳顯彝於見帶各軍均能設法籠絡卽著責成該道激勵將士迅將淄川縣城攻克儻徒以開挖地道空言遷延日月定將該道員從重懲辦決不稍寬至其與吳載勳辦理錯謬有無通賊各情仍著查明具奏將此由六百里各諭令知之○諭總理各國事務衙門奏江西等省教民事件請飭迅速完結並鈔錄法國照會呈覽一摺法國派兵在上海等處助剿已非一次此次照會內所稱各情顯因教民案件未能盡遂所請作此吶喝之詞豈能遽爲所懾第天主教自弛禁以後教民案件卽係地方大吏應辦之事中外交

涉事件如果中國理長固可與之力爭若貴州等省教民一案難保非濫殺無辜若再遲延不結難免外國人藉口有意延閣總理衙門王大臣僅能以口舌爭論自不足以折服其心勞崇光見在行抵何處卽著兼程馳赴黔省潘鐸早已抵黔著卽會同崇實先行妥商籌辦略秉章前有旨令毋庸辦理教民事件惟該督久任封圻見識周到或崇實有呼應不靈以致辦理或有未能得力之處該督仍應暗中商酌至江西湖南教民案件沈葆楨毛鴻賓亦當剋期妥辦完結母任日久遷延儻再延緩不結該將軍督撫等不能當此重咎也法國原照會著鈔給閱看將此由六百里各密諭知之○飭福建等省撥解銀兩濟臨淮軍餉○廣四川敘永簡溪邛廣安德安大竹岳池蓬溪樂山宜賓十一廳州縣學額各一名江蘇泰州六名通州五名○予山東陣亡直隸大順廣道秦聚

奎祭葬世職○甲子諭內閣前因給事中吳焯尙書羅惇衍先後奏參知縣許慶瑤等營私納賄並遊擊章昇曜私製破船走私漏稅各情疊經諭令晏端書逐款從嚴查辦嗣據奏稱許慶瑤等恃符狡執復經降旨將許慶瑤劉承緣章昇曜一併革職交晏端書審辦茲據奏稱提集人證逐加研訊分別覈辦擬結等語此案已革廣東候補知縣許慶瑤以家人蒙捐已屬有玷官常服官後復藉勢攬權勾通消息尤屬行止猥鄙著交部照例治罪已革廣西融縣知縣劉承緣冒代商人說合擅遞稟詞雖訊無贓私確據究屬不知檢束著交該駐防本旗嚴行管束已革遊擊章昇曜以阜役冒捐奉派省河緝捕膽敢豢匪濟私無惡不作實堪痛恨業經晏端書查明交勞崇光就地正法洵足以慰民情而申法紀已革道員俞文詔雖訊無惡劣款蹟惟不慎交游致滋物議著晏端書

勒令回籍毋許在粵逗遛候補同知潘世榮平日聲名平常鄉里不齒實屬不安本分著交部議處其請假在籍之編修葉炳華潘斯濂經晏端書查明向不干預公事其充商一節亦無確據均著免其置議○諭議政王軍機大臣等昨因勝保驕恣欺罔降旨將其革職拏問解京議罪並密諭多隆阿將一切事宜詳籌妥辦本日據英桂德興阿奏勝保劣蹟昭著訪實密奏一摺覽其所奏如所稱勝保虛報勇額及月提餉銀肥己累萬盈千且扣剋盤剝兵丁各等情節最爲重大他如捏報勝仗賄賂荒淫各節與疊次有人參劾摺件大致相同勝保受 歷朝豢養之恩當此時事艱難餉需支絀宜如何激發天良撙節覈實散放以勵軍心乃竟侵剋兵餉自飽私囊且子母重權精於滾折致飢兵四出搶掠接仗動輒挫敗負國殃民欺君罔上莫此爲甚本日業經派員將勝保京



師內外寓所貲財產業嚴密查鈔潼關見有勝保公館西安省城勝保亦必當有寄頓婦女貲財之處著多隆阿於接旨後迅卽派委委員前往各該處嚴密查鈔所有鈔出物件貲財卽著多隆阿傳旨賞給勝保部下兵勇以示澤普大公俾兵勇咸知感奮多隆阿接奉此旨務須密速妥辦於一二日卽行辦完不可稍稽時日仍一面遵照前旨將勝保各種款蹟並此次英桂等所參各節商同李宗燾詳細訪查據實參奏多隆阿傳旨拏問勝保如勝保尙敢抗不遵旨卽著多隆阿將其正法軍前以爲人臣欺罔不法者戒英桂等另片奏勝保所部兵勇由教捻投誠者甚多參將宋憬詩在河南時曾經反側難保不復生變此外恐亦類是若遣畱不得其法非騷擾地方卽暗投回逆不可不豫爲防範等語勝保所部半多降眾不馴之輩前經密諭多隆阿於駕馭畱遣一切辦法

務須詳細妥籌不可稍有疏虞致生枝節諒多隆阿必能領會此意爰速辦理英桂原摺片著鈔給閱看前據勝保奏稱催調在汰省募勇之記名總兵黃得魁帶勇迅速赴陝著多隆阿察訪情形如能得力卽將該勇調赴陝省如不得力卽咨行汰省遣散並已諭令張之萬聽候該大臣知照辦理穆騰阿之幫辦軍務係勝保奏請添派見在攻剿喫緊之際著多隆阿察看穆騰阿如不得力卽行奏撤將此由六百里加緊密諭知之○諭英桂德興阿奏參勝保劣蹟昭著並坐侵餉銀等款一摺勝保跋扈貪縱種種妄爲尙不止此數款朝廷早有所聞前據多隆阿奏稱本月十九日可抵潼關密諭該將軍傳旨將勝保革職拏問派員迅速押解來京議罪本日復密諭多隆阿將英桂等所參勝保各款嚴行查辦矣勝保路過晉省時並著英桂派委妥員會同多隆阿原派委員妥

押來京至勝保營中如宋憬詩劉占考所部降眾素不安分前亦  
密諭多隆阿設法駕馭恩威並用英桂等另片所奏宋憬詩降眾  
宜豫爲防範等語與朝廷前寄多隆阿密諭適相符合其晉省防  
堵事宜卽著英桂德興阿嚴密布置隨時偵探防範儻該降眾有  
反側生變渡河東擾情形卽著實力勦辦毋稍姑息將此由六百  
里諭令知之○諭本日據英桂德興阿奏勝保侵蝕兵餉各節復  
派員將勝保京師寓所財產嚴密查鈔矣惟聞穎壽一帶勝保另  
有眷屬寄寓並此外有無家屬寄寓之處著僧格林沁唐訓方不  
動聲色確切查明卽將勝保各寄寓財產全行查鈔迅速具奏至  
張漜之妻是否係爲勝保眷屬如訪明亦有影射寄頓情事並著  
一併查鈔前據僧格林沁奏參勝保收受陳玉城之弟賄賂賞給  
翎頂一節當諭令該大臣將陳玉城之弟二人查明係屬何名並

著僧格林沁查明迅速具奏惟勝保與苗練聲氣相通如事有相涉之處亦須斟酌妥辦將此由六百里加緊各諭令知之○乙丑諭內閣前因陝西軍情喫緊特命勝保爲欽差大臣督辦陝西軍務方期丕振軍威迅速底定乃勝保自督軍入陝以後節經光祿寺卿潘祖蔭奏參勝保在陝省冒餉納賄縱兵殃民順天府府丞卞寶第御史丁紹周華祝三先後奏參勝保擁兵縱寇聲名惡劣諭令僧格林沁查明覆奏復據嚴樹森疊次奏參勝保欺罔貽誤各摺片並鈔錄陝省親友紳耆歷敘情形各信函呈覽多隆阿奏稱接據陝省紳士耆民等信函公稟各件瀝訴勝保諱飾貪冒妄爲情形呈覽續經僧格林沁將勝保被參各款查覆具奏並據英桂德興阿奏參該大臣剋扣軍餉等情各款勝保前在皖豫督兵時節經嚴樹森袁甲三等疊次奏劾其荒淫貪縱朝廷以軍務方

殷人才難得暫緩查辦且擢任統帥令其督兵剿賊宜如何感激奮勉力圖報稱乃竟任性驕縱於督辦北路及皖豫軍務時供帳華侈糧臺設立雜支局糜費浮於正項收受劣員金安清賄賂代爲奏請獎勵丁憂回京時令金安清沿途代索奠儀又令劣員汪曜奎攬捐分肥侵吞隱匿軍營保舉各員俱令拜認門生餽送贊做並挈帶姬妾赴皖到處攜妓隨營令知縣李連芳代爲招往委員秦姓由揚州買婢送往潁州汪曜奎李連芳均因買送民女得有保舉復任聽委員濫賣功牌縱容家人丁祥捐納道員三品銜委用私人張仙保等在周家口設局抽釐不准地方官過問便於肥己該處匪徒殺害兵勇因其餽銀代爲消弭由河南赴陝西時經過州縣向地方官需索多金入關以後濫索過站銀兩俱應經過華陰地方被匪擄去軍裝器械並諱敗爲勝捏報大捷多次藉

以請獎納賄及虛冒勇糧縱兵姦擄任用劣員戴鸞翔賈甲等收受奉旨革拏之營員施鵬等餽送札給差使將拏獲從逆之馬承恩索銀釋罪又於營中雜畜優伶並於西安潼關等處收畱回婦及各處民間婦女其尤甚者認逆首張澐之妻張劉氏爲義女帶赴陝營並收納逆首陳玉城之婦爲妾陳玉城之弟二人因餽送銀兩擅將伊免死畱營給與翎頂至兵勇餉需輒敢按月提銀三千兩入已並將不敷分散之各營勇糧令其那借折作八成發出十成扣還其優伶之冒充親軍者則按月支放均無拖欠以致各營兵勇枵腹荷戈屢經挫失種種膽大妄爲實出情理之外以上各款疊據中外臣工臚列參劾並陝省紳耆士民信函呈詞申訴情形大畧相同是其劣蹟昭著已無疑義前因勝保在北路勦辦各股逆匪曾著戰功且平素帶兵尙稱勇往此次督軍抵陝時特

經寄諭該大臣飭令改過自新力求湔洗屢次諄諄訓誡至再至三冀其立功贖罪保全勛名乃竟視若弁髦毫無畏懼且驕恣情形日甚一日豈可再事姑容多隆阿業已行抵潼關著該大臣卽行傳旨將勝保撤去欽差大臣關防革職拏問卽日派委妥員押解來京交刑部治罪並派步軍統領存誠總兵崇綸西拉布將該革員京寓貲產查鈔其陝西軍營侵吞餉項及寄頓各處貲財卽著多隆阿嚴密查鈔並著直隸河南山東安徽各督撫查明該革員有無寄頓貲財一併查鈔該革員跋扈貪污欺罔無忌實屬孤恩負職罪由自取若不嚴行懲辦何以肅軍律而振紀綱多隆阿既授爲欽差大臣所有勝保統率各營兵勇亦著併歸多隆阿節制調遣除金安清業因另案革職查辦外其汪曜奎李連芳委員秦姓並勝保家人丁祥均著多隆阿查明如尙隨營卽著一併提

訊究辦並著安徽江蘇各巡撫一體查拏送至多隆阿軍營歸案  
審辦其周家口設局抽釐之張仙保及說事人李興泰李耀邦並  
送銀之何天佑李應章均著張之萬分別查拏審辦戴鸞翔寶型  
施鵬馬承恩見均在陝著多隆阿卽行提營歸案訊辦定擬具奏  
至勝保所部兵勇因其侵扣軍餉以致困苦飢寒朝廷深加廕念  
並著多隆阿將查鈔勝保畱陝貲財分給勝保所部欠扣銀糧兵  
勇以示優加體恤澤普大公至意其所部將士如有能隨同多隆  
阿奮勇勦賊恪守軍律卓著戰功者仍著該將軍一體秉公保奏  
毋稍歧視朝廷亦必立予獎敘不靳恩施也○諭議政王軍機大  
臣等勝保所部京營及東省馬隊各兵爲數不少特因勝保漫無  
紀律納賄行私不恤士卒致令各營解體多隆阿接統該營後務  
須申明紀律勤加體恤俾知感奮自可勦賊立功至王佐臣等所



部勇丁及宋憬請劉占考所部降眾尤爲桀驁不馴該營將士聞勝保獲罪難免各懷驚疑惟罪止統帥一人其劣蹟昭著之營員應行查辦者亦不過數員此外均無所問概免株連著多隆阿曉諭各營加意拊循並將拏問勝保明發諭旨宣示以安軍心各營勇隊及投誠降眾中非無可用之材多隆阿亦宜勤加簡練分別遣留不必概予裁撤以免紛出滋事勝保所部兵勇實數著多隆阿確切查明具奏以杜浮冒其被參隨營劣員除汪曜奎等業經明降諭旨查拏歸案審辦外尙有勝保倚通匪回弁馬兆麒金回同爲心腹用僨事勒休之提督孔廣順爲翼長收受通賊回弁馬振麟金盆美女札給差使並將地方官拏獲從逆之回教廕生馬承恩索銀釋罪又有鮮姓將官率領回眾千人由禁溝入關稱有餽送大帥銀五萬兩欲入廳城存庫並有由懷慶帶至陝省之陳

阿渾見遣其赴同朝賊巢講和各情事均著多隆阿嚴密查辦勝保家人丁祥見在軍營王天保前在河南戕害同官逃赴勝保軍營前經疊次寄諭飭令解交河南歸案審辦勝保至今抗不遵奉閭丕敏係奉旨正法之犯勝保亦屢次奏爲開脫其有無受賄庇護情事並著多隆阿將丁祥等一併提取嚴行審訊定擬具奏毋稍徇隱本日明發諭旨二道均著鈔給閱看將此由六百里加緊諭令知之○諭前因中外臣工先後列款糾參勝保已降旨將勝保革職拏問並授多隆阿爲欽差大臣督辦陝西軍務矣惟勝保所統兵勇人數眾多有畱防潼關及仍駐省城者恐一聞更易主將之信人心不無疑懼著熙麟瑛棨宣示朝廷意旨使知罪有攸歸罰無旁及該將弁兵勇等如果奮勇打仗無論何人統帶亦不能少掩其功降眾如劉占考宋憬詩等部勇尤宜加意拊循暗爲

鈴束務使眾志相安樂爲我用其有心懷疑貳則是自取滅亡卽與多隆阿雷正綰穆騰阿商酌辦理潼關地方緊要熙麟著暫行畱防以資坐鎮昨有人奏勝保駐軍西安時曾有少婦尋至自稱勝保義女求見是日晚勝保卽將此婦喚入公館逆首陳玉城之妻在安徽時亦爲勝保收納尙有不知來歷婦女二人均隨至潼關是西安潼關兩處勝保尙有寄頓眷屬貲財之處著熙麟瑛棨迅派妥員分往各該處將勝保財產嚴密查鈔瑛棨於陝回滋事以來一籌莫展厥咎甚重此時勝保多隆阿新舊交替之際於彈壓安撫一切事宜更屬責無旁貸西安爲根本重地防範未可稍鬆馬德昭能得兵民之心該撫務卽會同該提督妥爲宣示諭旨安定兵民之心是爲至要將此由六百里各密諭知之○諭直隸籌辦團練○丙寅諭內閣前因玉明等奏盛京禮部侍郎雙福家

人郎順有勒索商稅情事當經先後降旨將雙福撤去牛羊稅監督之任勒令迅將郎順交出並將雙福先行交部議處茲據吏部照約束不嚴例議以降一級調用可否抵銷請旨等語雙福於家人舞弊毫無覺察著降一級調用不准抵銷其家人郎順仍著玉明勒令雙福趕緊交出歸案訊辦毋任延宕○諭議政王軍機大臣等昨因勝保督辦陝省軍務驕恣欺罔貪劣昭著明降諭旨將勝保革職拏問並諭文煜等將該革員寄頓貲財嚴密查鈔及在營著名劣員交多隆阿提訊矣惟勝保營內劣員甚多或有回至河南等省者必得拏解多隆阿軍營審辦方足以申軍律而懲貪劣其在陝各員已諭令該大臣就近提訊所有河南已革遊擊王天保因殺死同官經嚴樹森奏參查拏審辦而勝保抗不交出見在是否在豫並周家口設局抽釐之署歸德府知府張仙保及說

事人李興泰李耀邦並送銀之何天佑李應章均著張之萬解赴陝西交多隆阿審辦候補道汪曜奎攬捐舞弊並兩次由江蘇購買婦女餽送勝保候補知府李連芳在潁州購買婦女數名送入勝保營內並有由揚州買婢女數名送往潁州之委員秦姓均係本年勝保在皖豫之事該員等卑鄙鑽營廉恥盡喪必須從嚴懲創恐有逗遛在蘇皖等省者著李鴻章唐訓方嚴密查拏一併解交陝西歸案審訊候補道韓泰華周祖頤二員有製辦軍械肥已之事若敢因勝保拏問潛入豫境卽著多隆阿咨會張之萬嚴飭回陝聽候查辦已革按察使周士鏜上年降旨革職逐出軍營何以嚴樹森所奏陝省紳士公信內仍有周士鏜在勝保營內總辦營務之稱並著多隆阿訪查如果周士鏜隨同勝保入陝其不遵諭旨黃綠舞弊必當重治其罪此時如同豫省卽著張之萬拏解

陝省聽候多隆阿審辦儻周士鏜自革職後並未在勝保營內則  
既往不咎著卽毋庸置議將此由六百里各諭令知之尋張之萬  
奏遵查張仙保未在周家口抽釐周士鏜自被參後並未赴勝保  
軍營均請毋庸置議委員秦姓查無其人李連芳已解赴多隆阿  
軍營李興泰等或係團練首事或係周家口行戶勝保赴陝時曾  
往犒軍並無送銀之事請免解訊從之○諭毛昶熙奏督軍馳赴  
汝郡情形並見存兵勇均係嚴加挑選一律整齊鄭元善奏督飭  
汝郡各軍攻克陳逆老巢並汝正各寨勦撫情形各摺片陳寨逆  
匪負嵎抗拒經總兵張曜等督軍攻克將寨平毀惟陳大禧見尙  
脫逃若迅速掩捕恐死灰復燃蔓延貽患著張之萬毛昶熙嚴飭  
該總兵等速將陳寨東南各賊圩次第掃蕩殲除陳逆以期淨絕  
根株前據鄭元善等奏明港寨民武象賢等誘殺賊目陳玉林並

將餘匪接殺開門乞降業已准令自新何得意存反覆著張之萬就近察看情形如該寨眾首鼠兩端卽著督飭各軍盡力剿洗俾新撫各圩咸知震懾軍威不敢再萌異志主事余本初率領馬步先後將張店尹寨張渡口等寨收撫捻首張鳳林率黨襲破楊莊姚寨並勾結王倫等賊股三千餘名攻撲翰東寨雖經余本初督勇擊退而張鳳林係著名巨捻豈容日久稽誅卽著張之萬等督飭在事員弁剋期殄滅其正陽蓮花寺一帶民寨見俱畏威歸順毛昶熙復派總兵趙鴻舉等督帶馬隊疾趨而進攻破楊家園葉家園等處見在軍威已振著卽激勵諸軍相機進剿迅將正境各圩一律蕩平廓清南圍鄭元善在豫年久所有該省一切利弊及近日軍務情形諒必知之甚悉並著詳悉交代張之萬接辦毋得稍存意見毛昶熙存營兵勇前經諭令親加裁汰見據該侍郎奏

隨征馬步各隊尙有四千八百名之多當此餉需支絀斷不可稍  
涉冒濫仍著隨時整飭汰除老弱勿稍遷就前因鄭元善奏攻克  
賊巢請將已革知州金朝棟知縣趙寶仁沈宣昭開復原官仍畱  
河南補用並免繳捐復銀兩當經降旨允准茲據吏部奏金朝棟  
三員均係隨時甄別革職之員情節較重按照章程卽加倍半亦  
難准其捐復惟查該員等屢著軍營勞績應聲明請旨等語著張  
之萬將金朝棟趙寶仁沈宣昭攻克二王樓等處賊巢如何出力  
之處及平日聲名政績如何一併確切查明據實具奏將此由六  
百里諭知張之萬毛昶熙並傳諭鄭元善知之○諭瑛棨奏佛坪  
廳被陷旋復畱陽縣城失守並請畱總兵慶瑞等馳援鳳翔各等  
語佛坪廳城雖已克復而賊蹤東竄仍向洋縣奔逃郭逆又由兩  
當徽縣竄陷畱陽是漢南賊氛復張必須迅速剿除方不至蔓延



句結多隆阿督辦全陝軍務責無旁貸卽著酌量情形相機撥兵  
會合楚軍迅圖撲滅總兵慶瑞請假赴陝該員於軍務一切是否  
諸悉至副將盧又能前曾有縱勇擾民冒功放恣情弊此次由川  
來陝是否賂秉章所派抑係另有別情瑛棨派令該員等帶領兵  
勇馳救鳳翔能否得力著一併查明據實覆奏將此由六百里諭  
令知之○諭熙麟奏陝西以西同鳳三屬爲膏腴之地見在富饒  
村鎮俱被回匪焚掠潼關以西大道梗塞商販不通庫儲業已告  
匱協餉屢催不應兵勇數萬枵腹荷戈譁潰堪虞見在多隆阿率  
馬步一萬五千來陝助剿深虞倉卒之間人馬口糧不能籌給業  
經函商英桂先劃撥一二萬兩懇請飭令迅解等語多隆阿督辦  
陝西軍務業已行抵潼關必須士飽馬騰方可一鼓作氣迅掃逆  
氛前諭英桂解濟多隆阿軍餉三萬兩恐發給一路口糧後到陝

已所餘無幾今熙麟因大軍將到餉無所出懇請於晉省撥解實屬非常緊迫著英桂於應解本年京餉內劃出銀三萬兩迅解潼關交熙麟收納以供多隆阿軍營到陝之用斷不准稍事延宕致誤要需其短解京餉仍著另行籌撥歸款以符原額將此由六百里諭令知之○諭傳諭陝甘總督恩麟見在陝省回匪鴟張定邊縣爲甘省入陝門戶該處距靈州甚近尤應防甘回竄越勾結前據該護督奏稱署甯夏鎮總兵侯雲登頗有膽畧著卽飭令該署總兵督率兵勇迅將金積堡等處回匪盡力兜剿以靖逆氛見在熙麟暫駐潼關一時未能前赴甘肅該護督責無旁貸務當振刷精神嚴飭派出員弁兵勇迅赴各該處力圖撲滅如令甘回偷竄陝境惟恩麟是問○予陝西陣亡通判穆克登布等祭葬世職○以崇厚爲兵部左侍郎

由內閣學士遷

志和爲盛京禮部侍郎

由左副都御史遷

○丁卯諭內閣官文嚴樹森奏臬司栗耀因病出缺請旨簡放另片奏道員厲雲官堪勝臬司並嚴樹森奏道員需才請飭員外郎范泰亨等三員赴湖北以道員差委各一摺本日已降旨將厲雲官署理湖北按察使矣刑部員外郎范泰亨前安徽候補知府李宗義刑部候補主事倪文蔚均著發往湖北交官文嚴樹森差遣委用朝廷任用賢才寤寐旁求惟恐不及封疆大吏均有薦賢之責屢降諭旨令各該督撫隨時保奏以備簡任而量才器使如何錄用則黜陟之柄操之自上非臣下所能干預故能綱紀整飭在諸臣有薦賢之美而無專擅之名從前巡撫胡林翼薦舉人才以救時艱亦止臚列才行聽候朝廷錄用從未有指明某缺懇請簡放者故進賢甚多而人心悅服近來曾國藩駱秉章屢奉諭旨令其薦舉賢才該督等詳審謹慎不敢自專曾國藩且有泛論人才

則可指明某缺則不可之奏杜漸防微深得古大臣寅畏不敢自  
專之義乃湖北省自本年以來遇有該省藩臬總兵及請旨簡放  
之道府缺出往往僅保一員懇請簡放朝廷因其期在得人悉加  
優容俯允所請第恐各省紛紛效尤不免有綱紀陵替之弊官文  
嚴樹森在督撫中俱屬親信之員如於所屬文武員弁有堪備方  
面監司等職者不妨於平時臚列密陳方合以人事君之義何得  
直待有缺始行保薦在朝廷雖諒其無他而於該督撫殊失寅畏  
之道嗣後湖北省有才堪錄用之員著官文嚴樹森隨時會同密  
陳不得指名某缺懇請簡放以符定制至員外郎范泰亨等三員  
雖賢名素著惟徑請越級以道員補用殊非明試以功之義著俟  
到省後著有勞績再行具奏庶各部司員不至心存希冀以外閒  
保舉爲捷徑也將此通諭知之○諭議政王軍機大臣等譚廷襄

奏教會各匪被官軍扼截已由南路回竄一摺此次匪首劉雙印  
句通教匪竄至鄒縣之中山店一帶斷我餉道並圍攻官軍營盤  
經翼長海羣等極力衝殺賊匪始行敗退惟棍幅各匪尙在鄒縣  
之西南游弋且教匪雖已遁回巢穴而既與各匪相合卽難保不  
去而復來譚廷襄請飭僧格林沁酌撥馬隊前因雲谷山失利匪  
勢鴟張屢經諭令僧格林沁酌量情形添兵助剿該大臣素顧大  
局斷無膜視之理惟此時棍教各匪合隊橫行淄博莘冠一帶蜂  
屯蟻聚未盡掃除全局至無可措手非得該大臣回駐東省節節  
掃蕩斷難奏廓清之功見在該大臣督軍深入捻巢聲威頗振卽  
著酌度軍情迅籌擣穴擒渠之策以便抽調大軍剿辦東省各匪  
於大局方有裨益近日蒙亳徐宿逃遁之匪多有竄入教幅黨內  
者以致與官軍接仗勢極兇悍捻首李成亦有裝旗糾眾欲來山

東找尋王廣繼之說是該擒等將欲舍其老巢而以蘭費滕嶧爲窟穴該處山深谷邃一經竄入其剿辦之難更非皖北可比僧格林沁務當妥籌兼顧酌撥馬隊會合東省官軍實力堵剿毋令匪蹤蔓延致東省益形糜爛譚廷襄續調曹登各鎮兵二千見在是否到齊卽著就見有兵力督飭進剿毋得一籌莫展貽誤事機蘭山一帶逼近淮徐前已諭令吳棠派兵會剿並著酌量情形迅撥兵勇前赴蘭嶧等處會同兜剿毋稍遲緩譚廷襄另片奏莘冠降眾張錫珠等因遮克敦布勒令呈繳馬匹堅執不從旋即潛逃在直東交界滋事等語降眾呈繳馬匹本年二月間曾據譚廷襄奏已令一律交官收納尙屬出於誠心此時何以又有勒交馬匹堅執不從之奏可見該撫奏報全是虛罔粉飾實堪痛恨又據文煜前奏內稱該匪有馬賊千餘步賊二三千人嘯聚如此之多而譚

廷襄漫無覺察不知平日所司何事見在道員秦聚奎陣亡賊勢愈熾譚廷襄務卽督飭常存等帶領兵勇前往剿辦迅圖撲滅稍贖前愆迪克敦布恪遵前旨添兵會剿務絕根株免蹈上年覆轍將此由六百里各諭令知之○諭勝保奏連日剿辦王閣村及涇陽等處賊巢情形歷陳傷疾並發請回京調理各摺片據稱陝省軍務喫緊非病軀所能集事擬將關防移交多隆阿督率辦理等語多隆阿本日已抵潼關十四十七等日所寄諭旨計可先後奉到卽著該大臣馳赴同州接受關防以重事權王閣村爲該匪巢穴該逆見將鳳翔之賊調回抗拒官軍是同州軍情尤爲喫重著多隆阿督率所部相機進剿涇陽賊氛尙熾成祿等是否可恃仍當統籌兼顧毋誤事機勝保所統各軍頗多降眾良莠不一自不能不量加簡汰第操之太蹙該軍士未免觖望恐紛紛逃散爲患

他處該大臣仍當寬猛相濟設法駕馭卽有遺畱務須斟酌妥善  
同州一帶爲該匪薈聚之所回匪兇狡百出且句合甚廣該大臣  
督軍深入尤當格外慎重加意隄防切不可輕身以先稍涉疏畧  
卽給使左右之人亦宜慎加防檢該大臣謀勇素裕諒必能悉心  
籌策計出萬全毋俟朝廷諄諄誥誡也勝保摺二件片二件均著  
發交多隆阿閱看將此由六百里諭令知之○以鍾岱爲左副都  
御史由通政使選鳳雲官署湖北按察使由荆宜施道署○予陝西陣亡遊擊  
馬麟祭葬世職○戊辰諭議政王軍機大臣等鄭元善奏汝軍攻  
克吳趙莊等處賊巢並張之萬奏豫省近日軍情及勝保遣人赴  
皖暗挑苗練各一摺皖毫捻匪經僧格林沁屢次擊敗勢難西竄  
豫省東路軍情稍鬆宛鄧髮逆復由浙川敗竄鄖陽豫省外患稍  
靖正宜及時將南路賊匪速行殄滅見在陳大澹老巢旣經攻克



則附近土匪正可乘勝勦辦張之萬俟省城部署稍定卽著速行  
出省前赴汝甯會同毛昶熙一軍督率張曜余際昌所部將該處  
餘匪盡力埽除以清積年巨患並將陳大濬迅速殲擒毋任漏網  
毛昶熙見已督兵馳抵汝甯並著會同豫軍合力兜勦毋稍遷延  
其汝陽境內吳趙莊吳同寨各賊巢業經汝軍攻克並將李寨等  
處收撫卽著張之萬飭令汝甯府知府劉成忠妥爲安插陡溝逆  
首張瀾林爲積年巨匪不得因其勢窮乞哀遽行議撫該署撫務  
當飭令李續燾實力進攻速將張瀾林殲擒毋貽後患角子山匪  
首李合已據鄭元善奏報擒獲仍著張之萬督飭劉車龍一軍將  
餘匪速行殄滅至吳正誼等爲苗練黨與潛行入關赴勝保軍營  
復經勝保令偕都司李德英暗回皖省藉募勇爲名暗挑苗練四  
五千人令於年底趕至關中情殊可惡見經張之萬派弁追至通

許將李德英截回卽著押赴僧格林沁軍營查辦此外有無勝保  
委員另從他道行走已入皖境及吳正誼是否已入皖境究往何  
處均著張之萬一面查明咨會僧格林沁辦理一面詳晰奏聞見  
在勝保業已革職拏問苗練聞信自不至再赴關中其從前有無  
業經起程隊伍及見在有無冒充潁州之勇改從僻道赴陝者並  
著僧格林沁一體查明截止勝保拏問之信苗練想已聞知該練  
見在作何舉動著僧格林沁隨時偵探情形迅速具奏將此由六  
百里各諭令知之○調志和爲盛京刑部侍郎以清安爲盛京禮  
部侍郎由內閣學士遷○己巳諭內閣前因御史陳廷經奏請變通營制  
以肅軍令而一事權降旨令兵部議奏茲據奏稱連年匪徒肆行  
騷擾各省道路半多阻梗總督駐紮地方與巡撫相隔較遠幅員  
太廣經畫難周如該御史所奏各情誠所不免自應量爲變通等

語嗣後除專設總督之直隸江南四川甘肅暨督撫同城之福建廣東湖北雲南仍遵舊制會同提督辦理並有提督省分之提標各營仍遵舊章毋庸更議及軍營所出之缺儘歸軍營量功升用外其江蘇浙江安徽江西陝西湖南廣西貴州等省各鎮協武職升遷調補著就近暫由巡撫辦理千總以下徑由巡撫咨拔報部守備以上有提督省分仍俟各鎮移咨提督查覈後由巡撫會同總督分別題奏至提督例應節制各鎮仍聽總督節制應亦照舊制外以上八省各鎮協均自總兵以下著統令就近兼歸巡撫節制以資整飭所有校閱營伍考覈將弁並本省籌辦防勦等事卽專責成巡撫經理設遇緊要軍務准巡撫卽時調遣後再行咨會總督儻該省有將弁怠玩營伍廢弛及措置失當之處總督有統轄之責仍應據實參奏其總督兼轄省分軍政考覈著徑由巡撫

就近註考確定去畱會同總督提督具題報部覈辦至督撫同城者仍照舊章辦理○諭張之萬奏查辦案內究出帶兵將弁捏稟邀功請旨革職歸案審訊一摺據稱汝州剿辦李瞻一案鄭元善係據副將楊飛熊楊長春等稟報聲敘入奏見經張之萬傳證訊供楊飛熊等原稟多屬子虛等語該副將等係帶兵大員輒敢飾詞冒功實屬謬妄楊飛熊見在省垣著先行革職歸案審訊○曾國藩奏金陵援賊經官軍擊退後謀報僞忠王李秀城並未回蘇仍與諸酋死黨在秣陵關六郎橋一帶修壘堅持俟僞侍王由東壩擡船過壩卽分向金陵金柱關以圖再逞十月十七八等日忠逆之子及僞漳王對王數股併趨九洑洲一面圍李世忠各營一面晝夜趕渡先後衝過江浦浦口者五六萬人曾國荃以南岸諸軍節節牽掣北岸郡縣處處空虛抽撥周惠堂等兩營搶紮西梁

山先顧濱江要隘又商令李昭慶帶張樹聲五營自蕪湖北渡救無爲州以保皖南各營辦糧之路臣亦飛調李續宜所部蕭慶衍八營移紮廬州毛有銘七營移紮巢縣部勒甫定而僞對王一股已衝過李世忠各壘從和州之青甸廟斜趨而西於二十七日陷含山縣二十八日陷巢縣十一月初一日陷和州幸張樹聲等五營已渡江駐紮無爲廬江縣亦截畱上海新募吳長慶四營入城駐守並截畱唐訓方新募何有能等三營與石清吉之兵協守廬郡此外衝要之所若店埠若運漕無兵扼防臣所調毛有銘一軍尚在固始蕭慶衍一軍尚在霍邱見令齊赴舒城再行進兵至甯國悍賊黃汶金胡鼎汶等自踞西河斷我水路糧運而僞輔王楊逆之眾又時聲東擊西四出剽掠臣所改辦陸運自南陵至甯國府城到處阻賊各營將士有缺食之慮十月十三日賊乘張運蘭

離營之際大舉攻城新任統將易開俊劉松山等登陴守禦礮石環擊賊始解退易開俊奉臣調援旌德之檄十一月初三日道出涇縣適有甯邑另股圖襲涇城欲橫斷徽甯之氣易開俊協同駐旌各營力戰卻之鮑超在高祖山屯營雖多分汎過廣小挫之後未可遽議戰攻前調王可陞五營及何紹彩四營擬令分駐板橋黃麻渡先保糧路俟赴湘新募之七千人陸續到皖再行分途痛勦至賴古諸逆之圍撲旌德者直薄城下環攻不休十月十七至十九等日朱品隆擊賊屢勝毀平二十餘壘賊始退聚九十等都旌城幸得解圍別有昌化廣德各賊黨突陷績溪縣城分竄歙境駐守徽郡之總兵唐義訓會同左宗棠派援之王文瑞等營於十一月初二日進攻績溪克復縣城而旌德境內之賊復於初三日闌入太平縣初六日進踞黟縣之西遞地方初七日竄陷祁門欲

斷徽州之餉道入江西之北境蓄計甚狡唐義訓王文瑞兩軍已回徽郡未知能否速攻祁門以圖克復竊計本年秋冬以來羣盜如毛南北環伺非先保皖北完善之區不能辦皖南之賊自和州以上直至蘄黃十數州縣千里無兵非有大枝勁旅扼駐廬州舒桐一帶不特爲皖北無窮之憂亦且貽鄂豫兩省之患毛有銘蕭慶衍雖稱健將不足當此一路李續宜病勢未痊亦難遽來惟貴州提督江忠義與安徽藩司江忠濬誼本兄弟又有伊兄江忠源遺愛在民廬人至今頌之合無仰懇 天恩飭下江忠義統率所部三千人馳赴皖北與江忠濬同駐廬境必能艱難共濟屏蔽江淮於大局實有神益又奏前因苗練擄殺尋釁臣擬撤去壽州正陽關湘勇並抽出霍邱防兵南防九洲洲粵匪業經具奏請旨遵行見在粵匪疊陷和含巢三州縣軍情緊迫不及恭候諭旨已將

蔣凝學壽州正陽關各軍撤回分守潁州霍邱騰出毛有銘蕭慶  
衍所部移紮舒城其壽正兩城隘函咨僧格林沁酌撥兵勇前往  
接防所有苗練各圩旣感僧格林沁撫馭給餉之恩又無湘軍偏  
處猜嫌之見目下必不另生枝節或者感激思奮隨同僧格林沁  
竭力勦捻亦屬意中之事 上諭議政王軍機大臣等曾國藩奏  
彙報近日各路軍情並撤回蔣凝學諸軍及祁門被陷各摺片覽  
奏曷勝焦急前據唐訓方奏稱和州含山巢縣三城連被賊陷當  
經諭令曾國藩等扼要嚴防會籌勦辦茲據曾國藩奏稱賊匪大  
股連陷含和巢三城幸張樹聲等五營由南岸冒雪渡江駐紮無  
爲州其廬江一縣亦截畱上海新募吳長慶四營入城並截畱唐  
訓方新募之何有能等三營與石清吉兵協守廬郡並調蕭慶衍  
等軍齊集舒城布置尙屬周妥惟賊眾兵單店埠運漕一帶尙無



兵勇扼守逆蹤飄忽殊甚誠恐著著落後曾國藩務宜迅速調度  
檄飭各軍實力堵遏一面知照唐訓方令將臨淮兵勇分撥店埠  
等處以免疏虞至李世忠本係幫辦袁甲三軍務從前袁甲三在  
臨淮時遇有奏陳皖北軍務關繫該提督軍營事件者俱於摺尾  
會銜具奏並將摺彙寄諭鈔給該提督知悉以爲駕馭籠絡之計  
該提督亦尙能奮勉效力屢著戰功此次該營被困唐訓方曾國  
藩均未據將詳細情形先後陳奏亦未經該大臣與都興阿撥兵  
往援是視李世忠一軍雖有如無來往去畱任其自便勢必漫無  
稽察恐其勢日形扞格因而生心著曾國藩都興阿富明阿仍遵  
前旨查明此次李世忠因何敗衄是否不肯出力抑真係兵單之  
故迅速具奏並查明營盤是否失陷卽由該大臣等迅撥兵勇前  
往援應不得置之不顧唐訓方李續宜嗣後相待李世忠可仍照

袁甲三之法酌中辦理以安其心常勝軍是否已到金陵江面著  
李鴻章迅速嚴催並著都興阿等遵奉前旨督催此軍會同水陸  
各營速將九洲攻拔以斷江路定遠一帶卽由唐訓方派兵遏  
截毋令賊匪北竄至蔣凝學一軍前經諭令曾國藩等不可撤動  
此次曾國藩因軍情緊急已先行撤回並咨商僧格林沁撥兵前  
赴壽州正陽等處接防惟僧格林沁兵力本非有餘壽州等處城  
關若竟空無一兵卽不至爲苗練所踞亦恐他匪乘間竄入如僧  
格林沁不能撥兵著唐訓方酌量派兵分往駐守至曾國藩所稱  
苗練惑僧格林沁撫馭給餉之恩無湘軍偏處猜嫌之見是蔣凝  
學一軍之撤非但防北渡賊匪兼可弭苗練構釁固屬一舉兩得  
惟蔣凝學等軍旣撤之後恐苗練肆無忌憚其欲復熾曾國藩唐  
訓方仍當會商僧格林沁等妥籌兼顧此次所稱撤兵以後苗練

不至另生枝節是否確有把握仍著曾國藩唐訓方隨時偵探情  
形具奏並酌度機宜辦理勝保見已革拏治罪該練首聞信後有  
無懷疑畏懼或誠心歸正絕無反覆之處均著僧格林沁密查情  
形覆奏不可稍行宣露鄂省東界緊接皖疆官文嚴樹森務須派  
兵嚴扼要隘加意防堵如廬郡等處情形再形喫重卽著速撥勁  
旅前往接應勿得稍分畛域至甯國涇縣旌德賊匪雖經易開俊  
等及朱品隆擊退並經唐義訓會同左宗棠派援之王文瑞等營  
將攻陷績溪之賊擊敗克復縣城而太平黟縣復有賊匪竄擾祁  
門縣城續行失陷賊蹤剽疾異常勢將延及江西斷絕徽郡餉道  
關繫甚重著曾國藩督飭皖南各軍實力勦辦務將祁門先行克  
復次第肅清徽郡各境浙省兵力尙厚著左宗棠派撥兵勇赴援  
徽郡以期力顧大局饒郡廣信一帶沈葆楨宜嚴密籌防毋令賊

以竄入並撥兵進援祁門以固邊境毋稍大意至皖北安慶廬縣一帶地廣兵單處處空虛賊勢過重情形萬分緊要曾國藩見請調江忠義督帶所部三千人馳赴皖北與江忠濬同駐廬境該提督見雖在粵境會勦蓮塘股匪惟皖北事勢較之蓮塘情形輕重懸殊自應先其所急著曾國藩毛鴻賓迅速知會江忠義卽日移營前往並著酌添勇丁一二千名隨後續往以厚兵力仍一面將起程日期飛速奏聞蓮塘股匪著毛鴻賓另籌兵勇會勦不准藉詞將江忠義奏畱致誤大局正在寄諭聞據李續宜奏擬俟百日孝滿後再乞寬假一摺見在皖北軍情緊急如此斷難俯允所請李續宜務當體朝廷不得已之苦衷不必拘定百日卽於葬母後速赴皖北並著曾國藩嚴切函催毋再遷延本日復據張之萬奏請調金國琛赴豫等語豫省將材甚少統兵之員著官文嚴樹森

卽飭全國琛赴豫差委毋稍遲誤將此由六百里加緊各諭令知之○諭奕梁等奏覆陳甯夏滿營官兵前次被賊衝散情形自請議處見在滿漢二城萬分緊急請飭陝西軍營援剿各摺片滿營官兵九月間在靈州遇伏挫失皆由佐領富隆阿防禦英明輕進所致及接仗之際富隆阿英明及靈州知州張瑞珍登陣觀望並不接應靈州參將亦未發兵救援二處帶兵官佐領多福駐守橫城希圖自固署提督定安嬰城自守未間接仗似此畏縮不前互相推諉以致官軍挫失甚多亟應嚴行懲辦著熙麟會同奕梁確切據實參奏富隆阿等輕進失利該將軍等素日訓練無方實有應得之咎姑念此項官兵尙非該將軍等親自統帶所請處分著加恩暫行寬免嗣後奕梁常陞務當督飭官軍嚴密防剿如再有疏失必將奕梁常陞從重治罪勿謂朝廷寬典可以再邀也懷之

甯夏滿營官兵飢寒交迫自屬實情著熙麟恩麟無論何款速行籌撥若干兩以資接濟回匪由通昌通貴各堡攻撲平羅縣城該縣知縣長謙帶傷回城甯夏道帶兵接仗失挫情形萬分危急著馬德昭酌帶兵勇星速前赴甯夏一帶相機剿辦逆回勢甚鴟張甘省兵力不敷抵禦馬德昭務當嚴飭各軍迅掃賊氛毋得遷延貽誤並著熙麟卽行馳赴陝甘總督新任俾資調度熙麟起程以後潼關一帶無人防守著多隆阿於到同州後卽飭穆騰阿迅赴潼關籌辦一切戰守事宜熙麟及馬德昭所部未到以前所有甘省軍務奕梁常陞恩麟均屬責無旁貸見據奕梁等調取鄂爾多斯阿拉善東西兩旗蒙兵來甯協剿卽著就見有兵力認真防守不得以專待援兵爲詞一籌莫展貽誤事機馬德昭本駐西安省城見在前赴甘肅應如何另撥勁旅駐守西安之處著多隆阿妥

籌兼顧將此由六百里加緊諭知多隆阿熙麟奕梁常陞並傳諭恩麟馬德昭知之○諭張之萬奏瀝陳下情請另簡豫撫並調員赴豫帶兵各摺片張之萬既經簡署豫撫惟當力任其難於一切用人敷政實力講求吏治與軍務相爲維繫如果守令得人則民氣自靖盜賊不興仍實行保甲團練以輔助官兵再能於帶兵將弁任使得人駕馭有法必能使地方日有起色四境漸次肅清至餉項支絀各省皆然所當開源節流痛裁冗費又在隨時悉心籌畫辦理該署撫初膺疆寄務須任勞任怨勤求上理以副委任不在博退讓之虛名也毛昶熙督辦團練身在行間歷有歲年於軍務地方尙稱熟悉該署撫不妨隨時咨商以收和衷共濟之效見在汝甯等處匪寨節次克復豫省情形已有轉機張之萬仍遵歷次諭旨卽日出省會同毛昶熙一軍將汝郡餘匪盡力掃除毛昶

熙已到汝甯張之萬未到以前卽著認真督剿以期早靖地方毋得遷延貽誤將此由六百里各諭令知之○辛未諭內閣據英桂奏稱閩敬銘瀝陳哀悃呈請終制稍盡孝思等語情詞懇切出於至誠惟見在山東軍務吏治整頓需人閩敬銘前在湖北辦事認真是以破格奪情畀以疆寄期於地方有所補救斷難俯如所請該署撫當體朝廷不得已之意移孝作忠用副委任著卽懷遵前旨迅赴山東接署撫篆毋許固辭○諭前因浙江甯波海口關繫緊要特諭秦如虎前往署理浙江提督嗣據耆齡奏秦如虎傷發未痊尙未馳赴新任因思浙江巡撫左宗棠等督率官軍進圍湯溪等城指日卽可掃蕩而下已革道員張景渠會同法國武官今充中國總兵之勒伯勒東及見充稅務司之法國人日意格等奮勇立功克復上虞縣城復力圖進攻紹興浙東軍務漸有起色官



軍進剿之際甯波府城不可無武職大員鎮守著耆齡卽飭秦如虎迅速馳赴署任毋稍延緩○唐訓方奏廬州密邇賊氛情形喫緊臣所部義字三營見已先後抵廬隨同石清吉之軍實力防守該逆偵知城守甚嚴未敢上犯而無爲廬江亦經曾國藩撥營駐守臣復令總兵張得勝派隊進扼定遠大局可期穩固惟該逆踰伏巢縣非加痛剿恐益滋蔓難圖蕭慶衍一軍前隊已到舒城毛有銘一軍亦當拔隊在途臣見函商曾國藩飛檄此二軍整旅前進迅圖攻克巢縣爲節節掃蕩之計上諭議政王軍機大臣等唐訓方奏整頓臨軍並催蕭慶衍等軍迅攻巢縣各摺片楚軍營制最爲整齊該署撫見畱張得勝統領凱字營復分四營令王才秀等簡練軍旅著卽飭該員等認真訓練以爲折衝禦侮之資不可有名無實所稱淮南一帶頻年被匪滋擾田舍盡爲邱墟見勉

籌牛種漸次招徠並舉行月課安撫民心自來吏治與軍務相表裏吏治興則軍務自有起色該署撫卽慎選賢牧令實心實力撫育斯民以圖長治久安惟潁亳一帶向爲張逆老巢該署撫見飭李文森署理亳州篆務著卽飭該員妥爲撫綏勿令致有他變定遠爲往來通衢恐江北賊匪圖竄該署撫已令張得勝派兵進扼該處著卽迅飭該員將西竄之賊實力堵截一面會同蕭慶衍等軍進規巢縣迅速攻拔並會合石清吉四營嚴防廬郡不可稍有疏虞苗沛霖近來作何舉動曾國藩昨奏皖北軍情緊急已將蔣凝學等駐壽頴等軍撤動此軍撤後苗練是否不至肆無忌憚仍行威脅各圩之處著唐訓方隨時察看與曾國藩熟籌辦理不可顧此失彼是爲至要將此由六百里諭令知之○諭勝保奏擊退援賊及餉銀被劫並眷屬爲德興阿拏辦請飭從寬省釋各一摺

此次解餉委員何以不慎探路徑小心防護致巨萬餉銀爲賊所劫該委員等是否被害抑係逃回晉省著英桂查明具奏勝保業已褫職逮治多隆阿督辦陝省軍務需餉甚殷仍著英桂迅速籌款源源接濟毋稍延誤見在大股回匪在同朝之間其勢並未少戢多隆阿務當酌度情形督率大軍分路進擣逆巢滅此朝食以副委任至勝保所奏伊妾呂氏由潼關渡河北上經德興阿挾仇指爲奸細拏交英桂訊辦並搶掠一空等語是否尙有不實不盡勝保京外寓所貲財均已旨查鈔著英桂查明如該眷屬帶有貲財卽著查鈔將貲財交多隆阿分給陝營將士仍一面據實覆奏山東軍務關繫緊要本日已明降諭旨飭令閻敬銘迅赴署任不得固辭並著英桂知照該署撫剋期前赴山東毋稍遲延將此由五百里各諭令知之○官文嚴樹森奏粵逆僞扶王僞齊王僞

啟王糾合大股髮捻擾及楚疆經我軍擊敗回豫因豫省未經派兵夾擊以致沿途裹脅復由桐唐新鄧一帶繞至浙川闌入楚境十月初九日圍撲鄖陽府城署總兵訥欽署知府艾浚美督飭營縣登陴固守連日縋城出勦斃賊極多知府周有全管帶礮船溯流而至水勇登陸截勦城上槍礮齊施殲賊四百餘名十八日訥欽艾浚美等督兵出城會合水師夾攻該逆敗退我軍乘勝追至河邊賊眾向西奔竄是役斃賊千餘名其夜四鼓該逆逆於安陽口等處搶船搭橋十九日大股陸續偷渡襄河署鄖西縣知縣林瑞枝督率團勇由天河口迎頭截擊擒斬無數二十日賊遂由均州分竄竹山房縣境內襄荊完善之區俱爲震動而荊門州屬之當陽遠安宜昌府屬之興山襄陽府屬之南漳穀城等縣路路可通尤爲喫緊臣等飭道員梁作楫率勇由當遠一路確探賊蹤迎頭

攔截並飭總兵楊朝林帶勇馳赴荆門策應又令宜昌府知府唐協和專防興山一路護軍統領舒保安襄鄖荆道歐陽正塘各率馬步諸軍專防襄南穀宜一路探賊所向相機進剿務使剋期掃蕩以全腹地而固邊圉 上諭鄂省素多勁旅甫報肅清何以該逆由李官橋西竄鄖陽該鎮道等境不能派一旅之師迎頭截剿見既闌入房竹不但荆門宜昌各屬路路可通卽陝省之興安府境亦虞竄越官文嚴樹森業經調派道員梁作楫由當遠一路探蹤攔截總兵楊朝林馳赴荆門策應並派護軍統領舒保道員歐陽正塘各率馬步諸軍探賊所向相機進剿兵力不爲不厚著卽嚴飭派出之文武員弁越境追剿就地殲除勿徒以逐出六境爲了事惟該匪被剿窮蹙勢必分股竄突秦豫邊境與鄂省毗連處所不可不豫作準備並著多隆阿瑛榮張之萬各就該省情形選

派得力將弁擇要堵遏毋使闖入陝豫境內與別股勾連又成不了之局將此由六百里各諭令知之○都興阿奏逆匪大股由九  
湫洲竄至江浦浦口後探聞多紮木簞安設礮位偽造官軍旗幟  
號衣意欲突竄儀揚攻撲前敵各營並分股上犯和含等情查逆  
情詭譎異常因我軍防剿嚴密難以明攻適值上海由皖北募勇  
陸續過境故欲假冒官軍乘閒竄突使我不及防備臣當通飭各  
營晝夜嚴防專派營務大員周歷巡察又於揚城內外及各鄉村  
鎮派撥弁兵盤查奸細並咨李鴻章所有續募皖北勇丁飭令由  
江東下使該逆不能遁迹計無所施臣前聞輪船入江攻剿九湫  
洲之信卽令黃彬帶師船先赴上游豫備接應嗣據統帶常勝軍  
道員吳煦自焦山來函云頭隊輪船已於十月二十九日行抵鎮  
江後隊因阻雨雪不無稽遲二十三日開當可抵鎮俟全軍齊至

整隊前進又云賊匪大股北竄浦口一帶即使常勝軍果克九洑洲殊無接應助守之師可爲深慮等語臣當以上游早派師船足爲輪船策應北岸賊勢蔓延防剿正在喫緊且該逆有水陸齊撲儀揚之信此時輪船駐泊大江無論能否攻剿得手實足以壯聲威等語專弁而覆刻下焦山僅泊輪船二隻吳煦已回滬催趲取齊適奉諭旨將黃彬解赴曾國藩大營查辦見值上游文報不通臣已飛催吳全美由下游趕赴瓜州會同副將刁經明上駛派員將黃彬由輪船解送安徽至臣於黃彬劣款未能覺察咎無可辭乃蒙聖恩不加嚴譴感悚莫名此後惟有督飭吳全美整頓水師力祛積弊以期稍補愆尤上諭江南逆匪圖竄儀揚攻撲前敵營盤該將軍等晝夜防範自可無虞疏失惟賊情詭譎著加意巡察毋使逆計得施該逆上竄含巢踰伏巢縣曾國藩等已調蕭

慶衍等軍進剿恐其回竄江浦都興阿等務當隨時探明派兵夾擊毋畱遺孽常勝軍頭隊已抵鎮江計日當已調齊著該將軍等嚴飭吳煦楊坊剋日進剿九洲洲如能將該洲攻克則南北之賊阻隔賊氛自滅吳煦等所稟各情意涉取巧著都興阿等傳諭該道等如能迅速立功朝廷必沛恩施若畏葸貽誤必從重治罪斷不准稍存推諉以誤事機黃彬劣款甚多都興阿未能覺察咎實難辭此次姑從寬免議嗣後務當時時警惕不可稍涉瞻徇致干咎戾將此由六百里諭令知之○王申諭內閣御史呂序程奏休致及永不敘用人員請不准開復捐復等語向來休致人員例不准其捐復其永不敘用之員劣蹟昭著情節尤重是以終身擯棄以示重懲定制綦嚴殲毫未能寬假乃近來各省休致人員往往保舉開復並於永不敘用人員亦請先行開復永不敘用之案以



爲將來保舉地步實屬故違定制殊非朝廷澄敘官方之意嗣後各省督撫及各路總兵大臣於此二項人員不准濫行保奏亦不准代請捐復如有仍前錮習違制濫保者必須將該督撫大臣從嚴懲處並將所保之員查明有無賄屬請託等弊分別從重治罪以杜鑽營而肅吏治○癸酉諭議政王軍機大臣等毛昶熙奏攻克賊寨並收撫被脅堡寨見擬赴正陽分途勦辦一摺官軍自攻克正陽閭家集後總兵趙鴻舉等復乘勝進克楊莊等五寨焚毀係樓一寨水圩四處知府劉成忠收撫堡寨四十六座吏部主事余本初收復寒堡六十八座總兵張曜等亦將附近陳寨各圩收撫信確一帶被脅各圩亦紛向李續燾等營投誠事機極爲順利正宜乘此破竹之勢將未盡餘匪悉行殄滅見在張鳳林一股最爲兇悍該侍郎督軍親赴正陽分東西兩路進擣該逆老巢而合

張曜疏通新蔡道路會合余本初團練三面進偪合圍著卽鼓勵將士剋期將此股巨匪殲滅毋稍延誤趙鴻舉馬隊已進紫銅鐘所有斗溝賊巢卽責令該總兵迅速攻拔並派兵駐防明港以便李續燾一軍得以全力圖攻邢集迅殲醜類將此由六百里諭令知之○予陝西陣亡遊擊鄒朝元等祭葬世職○甲戌吳棠奏山東棍匪教匪幅匪紛然肆擾築有圩砦藉圖抗拒誠如 聖諭若令其互相勾結聯成一片則兇燄愈張剿辦更無從著手臣見飭黃國瑞一軍奮力進擊不准稍分畛域惟兵勇僅二千人爲數尙單可否飭下僧格林沁酌撥馬隊千名馳赴沂州會剿早清東境便可併力南征實於大局有裨 上諭議政王軍機大臣等前因山東教幅各匪勢極猖獗曾經諭令僧格林沁吳棠酌撥兵勇馳援見在吳棠派令記名總兵黃國瑞管帶馬步兵勇二千名馳赴

蘭山會同剿賊辦理尙屬周妥惟蘭費一帶賊圩林立山徑叢雜  
必須探明路徑四面兜擊方可一鼓殲除著吳棠督飭黃國瑞迅  
督所部會同沂州見有兵勇併力攻剿山東教棍各匪業經黏成  
一片究沂兩屬幾於片地賊蹤該省兵力止有此數而賊勢日增  
往往不能堵遏仍著僧格林沁遵奉前旨酌派得力將弁飛速馳  
援拯民水火非但賊匪聞風膽落卽將士亦當爲之一振著酌度  
情形妥速辦理至黃國瑞初到東省人地不甚熟習督辦團練仍  
難驟期聯絡著譚廷襄責令該地方官實力舉行以輔兵力知縣  
長廣前經該前撫奏稱與同知奎芳等均爲沂營得力之員此次  
吳棠亦稱長廣勇敢有爲著卽督飭該員等激勵紳團趕緊勸辦  
與黃國瑞一軍互相援應以期得力其良團力能剿賊卓著成效  
者務須隨時獎勵加意籠絡俾官紳聯爲一氣用資捍衛譚廷襄

在任一日卽屬貢無旁貸著振刷精神督率將士就見有兵力奮  
圖攻擊迅遏賊氛將此由六百里各諭令知之○諭昨據勝保奏  
德興阿縱兵搶劫在蒲州城外東鹽郭村藉名盤拏奸細親帶馬  
步夤夜進軍將居民銀錢衣物等件搶掠一空該民人等均英  
桂行轅控告請飭查辦覽其所奏情節支離正疑其別有挾嫌情  
事茲據英桂奏拏獲勝保眷口請旨遵行等語勝保以帶兵大員  
攜帶侍妾已屬有違體制並敢擅納陳玉城之妻經德興阿拏獲  
後恐被指摘爲先發制人之舉猶敢託詞於賦性剛直不善周旋  
結納憎茲多口並舉郭子儀等以自掩飾其恣意欺罔實可痛恨  
該革員眷口旣經拏獲卽應提訊況有逆首眷屬豈可因其婦女  
卽行開釋著英桂親自提訊嚴行審問自皖省展轉赴陝各情據  
實具奏至德興阿所帶兵丁乘機入村搶掠至釀人命不法已極

據該撫所奏投井者二人受傷者二人而勝保則稱東鹽郭村民人呂德旺等六名或死或傷並村中大小男婦投井及被殺者甚多並將上元村富戶賈明剛等五十餘戶同時搶掠是否實有其事抑或英桂未及詳細查明著英桂再行確查並將已經拏獲之兵丁審明正法此項搶掠係何處兵丁均著查明具奏勝保原片著鈔給閱看將此由五百里諭令知之○諭平瑞奏歷陳餉需支絀設法補救一摺烏魯木齊處新疆北路之衝爲各處咽喉設立屯衛以備邊防軍餉最關緊要據該都統奏稱因歷年甘餉不繼兵丁習練弓馬官一與講求卽先聚眾乞餉以致兵丁驕悍不馴因之營弁亦不能嚴爲約束各營員弁亦難期振作前任都統奏將烏魯木齊巴里坤古城土魯番四滿營兵餉減五成折放銀二十萬五千七百餘兩歷年甘省所撥本城滿餉每年尙撥解五六

萬兩至三四萬兩不等近復絲毫未解所有巴里坤古城等處滿漢餉銀因甘餉不給兵丁嗷嗷待哺均不能相安據所奏情形實萬分棘手而該都統因地制宜當各項窘迫之際獨能推誠布公竭力首先倡捐並曉諭富商使知大義捐輸可望有成眾志亦藉以定安足見該都統補救有方深堪嘉尚著卽相機辦理妥爲安撫兵民以支危局惟遐荒之地商人生息無多如全賴勸捐濟餉亦恐難乎爲繼甘省所欠該處軍餉著熙麟等無論何款不拘多少趕緊撥解不得再爲耽延將此由五百里諭知熙麟平瑞並傳諭恩麟知之○乙亥諭議政王軍機大臣等遮克敦布奏濮州降匪豎旗滋事見在勦辦情形及譚廷襄奏教會各匪回巢追擊竄匪獲勝並勦辦降眾各摺片濮州降眾毛得平等突然蜂起膽敢踞城戕官該地方官平日何以毫無覺察該處與水套毗連匪首

吳錫潰尙在彼處潛匿設一句結更恐蔓延難制遮克敦布既稱  
伊綿阿熟悉該處情形著卽派令該總兵迅速前往會同譚廷襄  
所派之總兵常存遊擊祿彰等兵迅圖殄滅毋令蔓延降眾張錫  
珠既經勝保冒昧受降貽誤於前而平日反側情形譚廷襄並不  
留心防範以致復行煽亂見在擾及南宮各州縣殊堪痛恨孫治  
見已出省由省標津防所撥馬步兵丁計當先後到齊著遮克敦  
布會督兵勇並飭總兵常存等督兵兜擊迅將張錫珠一股趕緊  
撲滅儻敢稍事玩泄致令匪首復行旁竄必將各帶兵官重治其  
罪決不寬貸伊綿阿所部兵勇無多東省所派之兵亦屬無幾見  
擬撥京兵二三千名派前鋒統領西拉布統帶前往援剿此項京  
兵啟行擬令就近先剿南宮張錫珠股匪以便遮克敦布伊綿阿  
常有秦際隆等兵勇得以專攻濮州京兵行抵保定時一應軍火

糧餉著文煜妥爲籌備俾得迅速進行毋令阻滯至京兵剿辦南宮濮州等匪事竣以後仍須撤歸京營遮克敦布不得奏請歸併該營帶往山東其京兵未到以前遮克敦布仍當督飭南宮各州縣就見有兵力實力截剿不准專待京兵濮州城池遮克敦布奏稱於十八日失陷知州潘世鐸等是否在城市另行查參奏報各情諸多歧異著遮克敦布譚廷襄將詳細情形確查覆奏降眾游駛直東交界此拏彼竄防不勝防且襄脅日眾兵力時形不足著文煜譚廷襄於所轄各州縣聯絡鄉團輔佐官兵一體堵截教會各匪雖已回巢費縣賊匪被擊回竄此次飽掠而歸難保不突出紛竄仍著就見有兵力實力堵遏毋得專待援兵致滋貽誤將此由六百里各諭令知之尋譚廷襄奏濮州降眾因被民團拏豎旗倡亂未



及踞城旋經兵團擒斬署知州潘世鐸功過相抵請免置議從之  
○諭徐宗幹奏調集內地官兵渡臺分剿並臺灣道洪毓琛歷陳  
彰化逆匪情形各一摺逆首戴萬生自攻陷斗六門後進逼嘉義  
臺灣郡城亦岌岌可危曾玉明見顧北路保守鹿港未能分軍援  
嘉該撫見委吳鴻源暫署水師提督藉壯聲威著卽飭該署提督  
督率各軍奮力兜剿先將嘉義近城賊寨掃蕩克復斗六進規彰  
化以期與曾玉明合力會剿肅清臺境耆齡遠在浦城鞭長莫及  
該撫責無旁貸務當振刷精神嚴飭派出各軍實力勦辦並督飭  
洪毓琛就近激勵將士迅掃妖氛不得貽誤致干咎戾林向榮及  
斗六軍營文武下落迅速查明具奏將此由六百里諭知徐宗幹  
並傳諭洪毓琛知之○諭據崇實駱秉章奏遵查教民案件情形  
一摺所籌尙屬周妥黔省教民一案並韓超參款前經降旨令崇

州一城卽請僧格林沁派兵駐防並稱該大臣自問與僧格林沁毫無隔閡而外閒疑有剿撫議論不合之處苗沛霖肆其簸弄必使南北兩軍不和故欲調出湘勇爲思患豫防之計本日業經寄諭曾國藩以僧格林沁剿捻喫緊斷不能復分兵駐防若因無兵可分竟交與苗練駐守恐日久又成尾大不掉之勢是蔣凝學等湘軍仍應駐紮潁壽以爲互相鈐制之計該大臣等均屬公忠仍將辦理情形隨時咨會務須至誠坦示一氣聯絡其苗黨擄殺湘勇事出情理之外卽著僧格林沁嚴加詰問如果有心挑釁是並不能遵守僧格林沁節制叛逆復著當諭以朝廷寬宥不能再三曲徇並著將爲首滋事之人送出究辦若始終桀驁卽當告以必與楚軍合力痛加剿辦悔之無及本日寄諭曾國藩亦經諭令酌量給札責問該大臣等同抱忠赤之懷朝廷咸知諒必能相聯一

氣安籌辦理不至爲狡謀所構難也曾國藩原片著鈔給閱看將此由六百里諭令知之○諭鄭元善奏賊蹤距豫稍遠舞陽土匪蠢動並克徐范等寨及收復明港收撫興集寨出力各員請獎各摺片汝寨各軍連克徐范馮各寨陳大濬張鳳林諸股賊勢日形窮蹙我軍正可乘此聲威直擣該逆老巢以期殲厥渠魁著張之萬懷遵前旨迅卽馳赴汝州駐紮接統鄭元善之軍妥籌調度如必須進駐汝甯親督張曜余際昌等進剿方能得力並著相機辦理務將陳大濬等老巢合力攻拔俾汝郡迅就肅清角子山捻匪李合等結夥肆擾舞陽遂平汝陽知縣王元緒會營剿捕見經鄭元善派副將劉車龍統率所部前往舞陽會剿卽著飭令該副將會合民團速圖撲滅毋令日久蔓延粵匪見由浙川全股竄赴鄖陽該逆去豫較遠著張之萬嚴飭各軍實力堵禦以杜該匪回竄

承審各員嚴行審訊窮究黨與務令水落石出盡法懲治以申國  
憲毋得稍涉寬縱致干重咎何有保既已被戕毋庸再與田興恕  
商辦所有潘鐸自請交部議處之處著毋庸議將此由五百里各  
諭令知之○命張亮基以總督銜署貴州巡撫兼署提督

前雲貴總督

撤署巡撫韓超提督田興恕任聽候查辦○丙子諭內閣恩麟奏  
鹽茶廳大股回眾悔罪乞降一摺據稱鹽茶廳屬回目王大桂等  
因平遠所匪徒各處傳帖內有奉文剿滅回教之語以致回眾驚  
疑起事經該廳同知莊裕崧護涼州鎮總兵萬年新輕騎出城曉  
以大義責其變亂之罪並將前降曉示陝西漢回之旨對眾宣示  
講解各匪俯聽無不感泣悔罪懇求收復各股旋將蕭和城三百  
戶股匪招撫解散內有匪首馬彪等抗拒不服經王大桂等立時  
殺斃又緝獻各股匪犯七名固原匪首楊祥率黨圖竄亦經拏獲

殲斃該護督見派署臬司楊柄鏗馳赴固原秉公查辦並將王大桂等先行賞給六品功牌辦理甚爲合宜漢民回民均係朝廷赤子陝西搆毀以來百姓慘罹鋒鏑者不下數百萬人興言及此能勿愴然前經明降諭旨宣示並令帶兵大員但將爲首滋事之匪殲除其安分良回概不准其波及良回中有被脅勉從者儻能悔悟解散並免究治迄今數月悔罪輸誠者固不乏人勾結擾害者仍復不少該回民等久隸中華同受國家覆育之恩食毛踐土二百餘年其開濬登仕版者亦復不少豈無天良何至甘爲叛逆推原其故始則由地方官辦理不善遇有互鬪等事未能持平妥辦以致仇讐日深繼而陝回倡亂自知爲法所不容時造洗回謠言冀煽同類而無知漢民又常以殺回之語相傳述豈知朝廷一視同仁初無歧視嗣後各帶兵官及地方文武務當分良莠不分漢

回於抗拒滋事者盡法剿滅安分守業者爰爲保護悔罪乞降者亦准量爲寬貸漢民人等亦不得藉團練爲名尋仇擅殺自干重咎庶乎仇讐日消同登衽席以無負諄諄告誡之至意將此通諭知之○諭議政王軍機大臣等都興阿奏撥船援剿上游情形馮子材等奏接仗獲勝沈葆楨奏布置邊防各一摺金陵大股逆匪竄渡江浦浦口圍撲李世忠營盤分股竄陷和含巢三城見經都興阿派撥師船赴援石埠橋會同李世忠所部遊擊龔文林將附近一帶賊營十餘座全行蹋毀餘逆敗往龍潭尙能不分畛域惟江浦浦口等處李世忠營盤尙有若干座見在被圍情形若何仍未據都興阿詳細奏明著曾國藩都興阿富明阿仍遵前旨妥籌辦理務當加意聯絡力顧大局並將詳細情形覆奏江浦浦口賊壘亦宜迅速攻拔不得任令久踞常勝軍尙未到齊實屬疲玩並

著李鴻章力行嚴催毋許再事遷延致誤大局南岸福山白茆徐六涇等處集賊日多勢將北竄該處江面甚寬師船單薄都興阿等見已飭令副將林宜華等抽帶挖督等船馳赴通州等處協同各港師船堵剿著卽嚴飭下游將士實力梭巡以防逆蹤竄渡北岸左宗棠前調張家口馬二百匹見已行抵揚州此時道途梗塞無路繞越揚營馬匹正值短少之時著准其暫畱應用一面由都興阿等咨會左宗棠俟道路疏通再行解赴浙營至鎮江爲南北咽喉該逆屢次撲犯意在覬覦城垣且圖牽掣鎮軍俾不得分援北岸雖經官軍迎剿三次獲勝附近已無賊屯惟賊蹤飄忽靡常仍恐去而復來且慮糾集大股冀圖一逞馮子材等仍當加意嚴防不可稍涉大意皖南逆匪併力西趨豫章邊防處處喫重關繫最爲緊要沈葆楨見調道員段起由廣豐馳赴景德鎮節制水陸

各軍並咨左宗棠飭令同知王沐一軍由婺源疾馳景鎮副將顧雲彩等移紮弋陽玉山並守備法占雄等由省城等處分移安仁吉安以固腹地仍令韓進春一軍馳赴樂平視何路緊急卽向何路援剿布置尙屬妥協惟地廣兵單誠恐逆蹤紛竄有應接不暇之勢著曾國藩左宗棠隨時撥兵援應務於賊匪未入江境之先會同江西防兵迎頭截剿偪回徽郡並將祁門一帶賊匪迅速埽除以清皖浙諸軍後路王德榜見在龍游卽著左宗棠迅飭該革員統帶所部回防玉山毋稍遲延湖南毗連江西該省見無軍務著毛鴻賓選派勁旅隨時協助江西防剿皖匪以壯聲援將此由六百里諭令知之○諭傳諭護陝甘總督恩麟恩麟奏鹽茶大股回眾乞降靈州獲勝解圍並匪陷兩當經徽縣知縣截剿大勝密陳鹽靈滋事緣由請降旨曉諭各摺片鹽茶大股回眾經文武各



官開誠面諭悔罪乞降懇請解散徒黨聽候查辦固原首匪設法捕獲就地正法梟示該護督見委署臬司楊柄銓馳赴固原將王大桂等乞降一事秉公覈辦所籌尙屬周妥著將本日所奉諭旨刊刻謄黃各處張貼曉諭務使漢回百姓各釋猜疑毋再構釁生事降眾及滋事零股飭楊柄銓會督在事文武妥爲解散以靖地方至所稱靈州大股被官兵勦擊大獲全勝立解城圍請將侯雲登張瑞珍獎勵與本月二十一日奕梁等所奏平羅縣城危急甯夏被圍侯登雲退歸府城情形迥異旣據該署督奏稱該道五戰皆捷將士用命何以旋有平羅之失民勇潰散是否先勝後挫並前次勝仗是否確實著恩麟查明再行具奏知州張瑞珍前於甯夏滿營官兵挫失並不接應前已諭熙麟等查參並著恩麟查明該州有無觀望不救情事再行奏聞請旨辦理清水縣村鎮被匪

竄擾並分股攻撲秦安縣境該護督已飭楊永魁帶兵兼程前赴秦安督剿並續調肅州鎮兵一千名交楊永魁調遣著卽飭令先解龍山之圍相機解散蓮花城等處脅從再行進攻清水賊匪以期節節肅清馬德昭前已諭令帶兵前赴甘肅甯夏一帶剿辦惟西安省城見在喫緊該提督能否迅往尙未可知本日已諭令多隆阿妥籌辦理一俟西安接替有人卽催令前進恩麟當就見有兵力飭令在事文武妥籌防剿勿得專待援軍致滋貽誤另片奏陝西白吉原回匪與鳳翔回匪合夥時在近甘地方窺伺恩麟已派委營總雙英等帶兵在涇州靈臺一帶扼堵著卽嚴飭該員等會同地方官督率民團認真防守毋令匪徒闖入郭逆自白馬關竄入陝西畧陽縣見於通漢中要隘派賊把守恐其四出滋擾著卽飭令琿武等撥兵扼要防範勿稍疏懈已革甘肅提督成瑞係

奉旨革職解部治罪之員前經勝保奏畱未經允准該護督所請暫行畱甘差委之處著不准行仍著迅卽起解來京無任逗遛○駱秉章奏石逆屢次敗衄竄至貴州桐梓大定黔西等處旣被兵團堵截且地瘠無食可掠遂分股欲窺敘永詎知設備甚嚴乃由黔西竄入雲南鎮雄州境沿途裹脅其勢復張九月二十四五等日分五股由焦村直撲筠連經總兵熊煥章所部兵勇暨署知縣余元煜督飭民團連日力戰賊勢稍卻二十七日大股自吳家場雙合場來撲熊煥章兵勇僅千餘名兼須分顧高縣民團力不能敵筠連又無城池遂被該逆闖入余元煜禦賊受傷退守羅家坳該逆分股直撲高縣署知縣丁良俊帶團馳赴涼風坳堵禦賊已由玉黃樓鈔至城小團單於十月初一日被賊攻陷並分股上竄宜賓之橫江鎮丁良俊聞警督練折回熊煥章督率所部暨慶符

縣團練赴援初五日進攻高縣賊由西門突出被我軍擊斃甚多  
追殺十餘里立將高縣克復該逆悉遁橫江鎮欲搶渡金沙江進  
窺敘郡臣已先期飛調雲南提臣胡中和甘肅肅州鎮總兵何勝  
必總兵蕭慶高督軍由犍爲馳赴敘南相機截剿適張亮基行抵  
敘郡聞橫江喫緊已派參將楊發貴帶滇兵赴安邊協防與都司  
徐步雲兵團相爲犄角並派遊擊陶藻等帶勁勇三百餘名駐紮  
敘郡城外之眞武山初三至初八等日楊發貴徐步雲疊次擊賊  
獲勝沈毀賊船多隻斃賊目數名該逆未能搶渡惟金沙江上游  
數百里南岸多係滇省地界毫無攔阻處處可以偷渡見在蕭慶  
高分軍由敘郡南岸進紮觀音堂水洞坎一帶以顧敘南門戶何  
勝必分軍馳赴屏山以防該逆由雲南之副官村偷渡上竄臣復  
飛飭馬邊雷波屏山各廳縣將沿河船隻撤退並調團練嚴防上

游布置既密該逆勢將仍循滇境下竄琪縣長甯興文敘永在在堪虞臣復調川東鎮總兵唐友耕一軍由江安疾趨慶符並調臬司劉嶽昭所部由綦江馳赴長珙總兵吳安康一軍已抵敘永一俟諸軍雲集卽併力截剿以圖聚殲一面飛咨貴州撫臣派兵嚴扼黔西畢節一帶使賊不能橫竄旁逸至筠連無城可守署知縣余元煜力戰受傷以致賊匪闖入縣治署高縣知縣丁良俊到任未及一月帶團出禦回援不及縣城失守旋經收復余元煜丁良俊相應請旨革職暫畱署任並飭余元煜力圖克復縣治其餘文武下落容俟查明覈辦韓超田興恕奏石逆擁眾入黔分撲遵義桐梓經官軍擊敗不能深入遂分竄仁懷綏陽並由黔西奔竄大定署仁懷縣知縣沈俊集團守禦閏八月二十七八等日疊次擊敗撲城賊匪並開城迎剿斃賊無算生擒賊首三名賊向茅臺村

一路竄去其竄綏陽一股約三四萬人九月初一日圖襲綏城守備廖熙麟率練堵禦時候補道于鍾岳在遵義剿匪抽調各軍徑趨綏城賊乃不敢撲城竄至遵義東鄉焚掠知縣張思敬等帶隊由東南截剿副將全祖凱由西南兜擊賊眾敗竄全祖凱拔營跟追斬獲多名賊竄黔西州境經總兵沈宏富派隊擊敗復向大定與前竄定郡之匪合股肆擾窺伺郡城署咸甯鎮總兵李有恆奉檄督隊赴援與署大定府知府曹琅會撥兵練分隊設伏誘賊鈔擊李有恆親督中軍策應曹琅率同紳民嬰城守禦初八日賊撲東城我軍佯退誘之賊至伏兵齊起回軍夾擊斃賊無數生擒十一名正在追剿間突有另股從南北兩路撲來我軍分投截擊斃執旗賊首一名逆眾敗潰李有恆督軍追殺賊屍枕藉該逆退紮距城十餘里之欄鴉地方初九日我軍乘勝進剿沈宏富派副將

胡均祿等帶隊繼至賊由西路竄去該處係入水城卽岱二廳僻道又通平遠難定賊蹤所向且有由小壩等處竄入畢節者臣等飛飭沈宏富李有恆分軍追剿署平遠州知州龔秉琳等集團防守賊竄府州交界之大兔場李有恆追軍與各團協剿拏斬多名二十一日賊竄卽岱廳屬二十四日直撲廳城署同知嚴謹等率兵團守禦擊斃賊匪多名臣等聞報添調兵練前往援剿三十日嚴謹偵知賊在城外壽佛寺開挖地道已偏城根當卽掘濠灌水以破之並令同知孫清彥率練勇攻毀壽佛寺該匪敗逃十月初一日賊由東北二路攻城我軍迎擊復有斬獲是夜賊眾分竄安南永甯等處見催援軍分投堵剿其竄畢節之賊偏近縣城經署知縣馬應鏗調團堵擊固守城垣李有恆派軍追至賊向雲南鎮雄州一路竄去查石逆兇狡異常竄突靡定幸地方文武守禦皆

嚴將士用命得以屢挫賊鋒見在分竄安南永甯各股人數尙眾  
臣等惟有督飭各軍迅圖撲滅以除巨患 上諭石逆入黔後經  
該處地方文武及總兵沈宏富李有恆等軍節節堵剿該逆不能  
逞志復由雲南鎮雄州回竄川境疊陷筠連高縣並上竄宜賓之  
橫江鎮意圖搶渡金沙江窺伺敘城雖經總兵熊煥章等督兵將  
高縣城池克復參將楊發貴帶領滇兵及都司徐步雲督飭兵團  
分路堵截擊毀賊船數隻未經搶渡而該逆兇燄頗張尙未大受  
懲創亟須厚集兵力以圖聚殲賡章見飭蕭慶高進紮敘郡南  
岸何勝必馳扼屏山唐友耕疾趨慶符劉嶽昭馳赴長琪布置均  
尙嚴密卽著飭令各軍聯絡聲勢務將積年巨憝實力殲除勿徒  
以偏賊出境爲了事又爲他日邊患其敘郡一城濱臨大江爲川  
南緊要關鍵尤當嚴密守衛毋稍疏虞劉蓉前在龍硯場督軍殲



擒李卯等逆見在該藩司諒已回省川南軍務緊要石逆又積年悍賊卽著駱秉章傳諭劉蓉迅速前往敘郡督師進剿以期早殄妖氛其黔省安南分股著韓超迅圖撲滅並分撥兵勇會合川軍以剿爲防毋令該逆被剿窮蹙再竄黔疆又成不了之局至漢南軍務緊要曹燦章一股前已竄至石泉郭逆竄陷兩當直撲徽縣見復回竄畧陽陝省兵力不敷前經諭令駱秉章派兵兜剿著該督仍遵前旨力籌兼顧以靖鄰疆其周紹湧一股前竄開縣渠口欲由太平遁出川疆見在剿辦情形若何並著飭令帶兵員弁將此股餘匪趕緊撲滅毋致蔓延將此由六百里各諭令知之○予甘肅陣亡知縣姜熊遊擊梁生輝等祭葬世職建祠四川陣亡舉人樊包建祠○丁丑諭內閣前因直東防務緊要派令正白旗漢軍副都統遮克敦布赴大名一帶督兵防剿迄今時閱一載該副

都統未能實力辦理致賊勢仍形蔓延實屬玩誤且辦理降眾未能妥協致令乘機生變毫無覺察尤屬昏愎無能遮克敦布著先行交部議處仍責令督率兵勇迅將直東賊匪實力殲除以贖前愆儻敢仍前玩泄貽誤軍情定卽從嚴治罪決不寬貸○諭議政王軍機大臣等有人奏張錫珠竄至威縣曲周時僅數十人數日之間裹脅招集竟至千餘署大順廣道秦聚奎等追匪陣亡後其勢愈張旋渡衛河衝冀之鹽匪景德之馬賊屬起相應遂至數千見已竄至臨清之桑園村清河之董家廟威縣之干集村並南宮之梅花鎮冀州之百花村棗強束鹿一帶村莊均被搶掠南宮縣城被該匪占踞一晝夜而去等語張錫殊股匪自竄入畿南後蔓延日廣雖經文煜派兵堵截並未大受懲創孫治見已出省辦理防剿尙恐一人難於兼顧畿輔重地賊勢鴟張如此儻蔓延日廣

爲患豈可勝言著文煜剋日起程馳赴省南視賊勢趨重地方會同遮克敦布四面兜剿將此股匪徒就地殲除不准以驅逐出境卽爲了事山東濮州降眾見復豎旗起事若不速將張錫珠股匪殄滅任其竄回東境與濮州賊匪勾合勢必益致燎原辦理更難著手北路防堵固應嚴密西路逼近晉疆亦須扼要嚴防文煜英桂務宜妥籌兼顧毋任賊蹤四出紛竄至賊匪竄擾威縣南宮棗強束鹿等處並未據文煜詳細入告著卽查明迅速具奏不准意存諱飾見在該處賊匪是否尙在屯聚南宮縣城曾否被賊占踞著卽迅速覆奏深州束鹿衡水甯晉各州縣團練尙稱得力文煜並宜設法激勵遮克敦布在直東一帶剿賊日久無功本日已明降諭旨將該副都統議處若再不實力剿賊力求實效自問當得何罪王榕吉前在大順廣道任內深得民心團練亦樂爲之用若

令暫赴直隸防剿自可得力惟晉省汾州等處防務亦屬緊要著英桂察看情形如該處防務稍緩卽著飭令該臬司暫赴直隸俟防剿事竣卽行回晉至晉省平定州與直隸鉅鹿一帶毗連防務亦屬緊要著英桂派撥兵勇扼要堵截毋令賊蹤竄入王榕吉如不能前赴直隸或令移防平定一帶並著英桂酌度辦理將此由六百里各諭令知之○諭薛煥李鴻章奏籌辦布路斯國換約事宜一摺外國總領事之職應與藩臬同品薛煥等以列斐士本職不應以平行照會呈遞總理衙門設法剴切開導令其改繕申陳外國與中朝往來交接禮數國體攸關薛煥等與該公使反復諭導不激不隨得以折服其心改具申陳永爲定式深堪嘉尙列斐士將德意志公會二十二國各繕洋字條約一分欲於換約時均請查收並請中國亦備漢文條約二十二本與天津所立條約原

本同日互換以便分交公會各國收領經薛煥等據理開導該公使改請於原立條約互換之後照錄分送見仍飭由劉卹膏給予照覆並速催爲換約斟酌極爲妥協著薛煥李鴻章悉心籌商相機辦理所請照錄條約二十二本僅鈐用江蘇藩司印信之處卽著准其照辦至各國呈遞洋字條約一層如該公使再行固請收納並著照薛煥李鴻章所擬與該公使議明卽交換約衙門存案將此由五百里諭令知之○是月緩徵直隸深州等三十二州縣歉收蠲緩開州等三州縣被水新舊額賦租課暨民借倉穀並賑災民口糧